

小華外史續

共六

リ 6
4074
6 15



門 伊 6
號 4074
卷 6-6



小華外史續編卷之一



王人姓名記

首陽逸民吳慶元 編輯

男顯相重校

象村申公撰王人姓名記只記其往來年月故隨其往來以一人之事故分錄於各年之下覽者易眩今乃撮合成書又以事實採入於姓名之後分註原本與引用書目而區別之

兵部衙門原本以尚書係之于沈惟敬傳後今乃移書于卷首特揭兵部衙門字

石尚書名星字拱辰魏郡原本東明人嘉靖己未進士擢

給事中隆慶中上書極諫 帝大怒詔杖六十絕而

復甦其友穆文熙護歸鄉里萬曆元年起故官明史遂

大用朝野想望其風采有文章節行壇宇俊偉一見知

其為大人也原本○朝野會通公身長八九尺容顏絕人眼光炯然對我使言我國事往往流涕

其誠懇如此壬辰寧夏哮拜平敘功加爵其年倭大入朝鮮

朝鮮乞援星欲自將救之帝不聽甲午曩平

壤功次命星賜麟皇明實錄星沈毅篤實居官有重望然本

文士不長於兵力主沈惟敬封貢議竟以此敗丁酉逮

星下獄妻子皆戍瘴鄉星既被繫猶上書政府以息兵

省餉為言辭旨酸感論者諒其心焉已亥九月星竟死

獄中明史我國以尚書力排眾論出兵來援感其恩祭

卯為建祠於平壤府與李提督俱祀之本天啓初侍郎

鄒元標訟星志在為國且推寧夏功詔復官還其子於

戍所明史○白沙集吾等方坐中廳打發行李忽一

揚應春也尚書聞吾等來欲致意望救無因得通適是日臨行館門無禁故其人乘便而入極致尚書之意欲

使歸啓本國費一辭以救已也

常鶴原本都司乙未秋九月尚書石星差鶴往金山

探聽鶴回陳倭情變幻封事不可輕行星不然之平壤

錄

詔使衙門

天朝詔使將臣先後去來姓名記自壬辰至庚子○右原注

薛藩號仰屏廣州府順德縣人已丑三甲進士壬辰六

月奉勅到義州本還朝以書先報曰今朝鮮垂亡危在

朝夕然綸音一布鼓其忠義之心作其敵愾之氣莫不以恢復為念誓不與倭賊俱生乘此人心加以精兵與彼挾攻則必可計期勦滅矣錄尾

司憲號晉臺河南府睢州人萬曆丙戌進士癸巳十一月以行人奉勅出來十二月回去性乖戾好馳馬上下峻坂行程無晝夜疾驅遠接使僅能追及既還為御史韓取善所劾革職原丙申以奉使朝鮮頗濫受贓物命刑部追比折納銀兩解進皇明實錄

祖副摠兵以下諸將官原本在李提督下今移書于此以別其出來先後

祖承訓號雙泉寧遠衛人以寧遠伯李成樑家丁拔身為副摠兵右軍都督府都督僉事壬辰六月出來七月與史游擊儒敗於平壤革職十二月以李提督票下聽用出來協攻平壤有功仍任遼陽協守旋又以罪革職丁酉又隨邢軍門來與高策南征島山守箭灘夜半率敢死士二十八人潛入西生浦拔吊橋上牌字而回及退軍楊經理送于星州令遏焚略之賊是年秋李如松戰歿而遼陽無宿將召還甚惡馳到王京經理以虜騎已退不許西歸領遵化步兵七千人協董一元討泗川諸軍失利而承訓獨能軍承訓素善戰勇敢而御眾寬簡

以此得士心原本

郭夢徵號思齋廣寧前衛人壬辰六月以欽差統領薊

遼調兵參將領馬兵五百隨祖承訓出來七月回去原本

王守臣號德軒遼東三萬衛人壬辰六月以欽差統領

廣寧營兵游擊將軍領馬兵三百出來與史儒敗於平

壤七月回去又以聽用隨李提督出來原本

史儒原本遼東游擊壬辰六月與參將郭夢徵領兵一

千到宣川林畔館即還屯義州國朝實鑑七月隨祖承訓攻

平壤中九死日月錄詔優恤戰亡史儒等皇明實錄

戴朝弁以欽差統領遼兵游擊將軍領馬兵一千壬辰

六月渡江軍令甚肅民便之七月敗於平壤中九死其

千總張國忠馬世隆等亦死原本

馬世隆遼東人以祖副總千總與史儒攻平壤劔擊殺

賊甚多竟被賊所殺原本

張國忠原本戴朝弁千總壬辰七月隨朝弁攻平壤中

九死日月錄

宋經略以下諸官一時往來衙門原本

宋經略名應昌號桐岡杭州右衛籍仁和縣人原本為人

方正紫髯目光炯炯如巖下電沈毅慷慨有英雄器略

兩朝平壤錄嘉靖乙丑進士萬曆壬辰以兵部右侍郎右僉

都御史來督禦倭軍務原本以巡撫山東條上海防事宜

預策倭為患進選將練兵積粟三策已而語驗廷議服

其先見故推用之明史蒙癸巳三月渡江駐安州四月十

八日王京之賊遁歸原本帝命各鎮兵以次撤歸明紀

本經略乃於九月還原本甲午九月兵部覈東征功次謂

應昌慨然主戰卒成平壤之捷其勞最著命陞應昌為

右都御史皇明實錄未幾我國差陪臣黃璉齎賊情經略

攔止之不得達後為給事中許弘綱所劾致仕回籍原本

宋經略票下官原本

王承恩大寧前衛人以原任薊鎮東協副摠兵後府

署都督僉事為中軍隨宋經略出來未久經略參其

私賣官馬革職去原本

王汝徵以統領營兵游擊將軍指揮同知領馬步兵

二千壬辰十二月渡江住定州同宋經略回去原本

張九經號鳳竹河南睢陽衛人以中軍旗鼓官隨宋

經略出來同經略回去丁酉復以邢軍門旗鼓官拜

來同軍門回去原本

蘇國賦以隨營參將出來同宋經略回去原本

劉黃裳字玄子號太景河南汝寧府光州人萬曆丙戌

進士壬辰以欽差經略贊畫防海禦倭軍務兵部職方

清吏司員外郎出來本原臨鴨綠江望朝鮮萬峰出沒雲
 海慷慨誓曰此汝曹封侯地也本明紀在義州聞平壤收
 復星夜馳進軍前其後上本稱平壤克捷之日臣實同
 往云且請今天朝人與我國開市見輿地勝覽有三浦
 倭舊說告經略經略上本以為金山未撤之賊乃原住
 倭戶也兵部信之至請科官許弘綱往金山查驗弘綱
 行到遼東知賊兵之未退倭戶之為誣上本明之員外
 自撰金山銘文言倭賊已退天兵直到海上文甚誇詡
 其謬誕如此癸巳九月回去本原甲午覈東征功次黃裳
 機叅帷幄陞賞皇明實錄

袁黃字坤儀號了凡浙江嘉興府嘉善縣人萬曆丙戌
 進士壬辰以欽差經略贊畫防海禦倭軍務兵部職方
 清吏司主事同劉員外出來一路官站置標下差官禁
 其作挈性好佛道持身如山僧嘗與我國議政崔興源
 語曰中國昔時皆宗朱元晦近來漸不宗朱矣興源曰
 朱子無間然矣主事頽然不悅翌日移咨舉四書註疏
 逐節非毀之遣馮仲纓于安邊賊壘欲圖回兩王子不
 果出來久言官劾其左道惑眾革職癸巳六月回去本原
 周維翰號韜宇直隸河間府阜城縣人萬曆庚辰進士
 癸巳二月以欽差巡按遼東兼管海防軍務監察御史

出來監軍到平壤六月回去性簡重不喜與我國人相接天朝人亦憚之原

韓取善號暉菴山東濟南府淄川縣人萬曆丁丑進士

癸巳二月以欽差分守遼海東寧道兼理屯田山西布

政司右布政出來監軍七月巡王城即還原

艾維新號時宇河南開封府蘭陽縣人萬曆丙戌進士

癸巳正月以欽差經理征倭糧餉戶部山東清吏司主

事來管餉以催運不及期杖檢察使金應南戶曹參判

閔汝慶義州府尹黃璫所過股粟七月回去原甲午覈

平壤功次以維新計周轉輸陞賞皇明實錄

賈維翰字無局號知白直隸順天府遵化縣人萬曆癸

未進士以欽差查驗軍功兵部武選清吏司主事癸巳

三月出來查驗軍功于江上勞軍於安州即回已亥四

月以原任郎中佐萬經理再來原八月經理萬世德偕

李承勛登金山巔刊石勒銘使維翰叙其事金山碑庚子

七月回去原崇禎庚午孫承宗遣謝尚政等復遵化擒

中國叛人授偽官者明史賈維翰等十一人獻俘闕下皇

識小

鄭文彬以原任河間府同知管糧壬辰十二月出來癸

巳九月回去丁酉再來管糧于平壤原

王君榮號惠泉山東青州府益都縣人以原任通判隨
宋經略出來專管餉銀癸巳九月回去本原甲午覈平壤
功次以君榮出納不喪陞賞皇册實錄

趙如梅號肖菴遼東鐵嶺衛人以山西潞安府壺關縣
知縣壬辰十二月出來管糧賊退隨李提督入王京俄
為宋經略所參癸巳九月回去丁酉再來管糧于平壤

本原

胡澤號龍山浙江紹興府餘姚縣人以原任官往來賊
營後以顧經略票下再來本原誘我奏乞封貢同許項去
國書又隨丁酉大軍出來本原

沈思賢字邦達號沙川浙江紹興府餘姚縣人以原任
通判隨宋經略出來與沈惟敬入倭營丁酉又隨陳御
史來管糧本原

陶良性字養吾浙江處州府縉雲縣人以監生隨宋經
略出來丁酉邢軍門題請良性備知朝鮮事情移授水
平府通判以幹征倭軍餉詔從之及到我國專掌四路
餽餉條理甚悉亦能戢下時天兵大陣久住王京士卒
撤人家屋以為薪良性管事設法嚴禁都人賴之戊戌
三月出來己亥三月回去八月又來庚子十一月回去
本原

李提督以下諸官一時往來各衙門原本

李提督名如松字子茂號仰城成樑長子成樑高祖英

自朝鮮內附原本云其先即我國理山郡人世授鐵嶺衛指揮僉事成

樑英毅驍健有大將才襲職積功至寧遠伯邊帥武功

之盛二百年來未有也年九十卒弟成材參將子如松

如栢如楨如樟如梅皆總兵官如梓如梧如桂如楠亦

皆至參將明史世比之郭汾陽提督李如松父寧遠伯

國理山地兗魯江因殺人逃入鐵嶺成樑父得邊功為

游擊成樑蔭指揮少擊虜多獲起為險山堡參將許頴

陽將劫成樑乞於譯官郭之元居間得免不數年立功

為總兵拓地千里立石堡勲封伯子壻高官者十餘人

責榮耀近代無比壬辰如松以欽差提督薊遼保

定山東等處防海禦倭軍務總兵中軍都督府都督同

知出來十二月二十五日渡江原本如松長身偃蹇禮容

閑熟風采俊發言語洪暢盡敬於王極其恭順詩齋

至安州題詩寄體察使柳成龍曰提兵星夜渡江干為

說三韓國未安 明主日懸旌節報微臣夜釋酒盃

歡春來殺氣心猶壯此去妖氛骨已寒談笑敢言非勝

筭夢中常憶跨征鞍西厓集癸巳正月攻平壤克之進向

王京遇賊於碧蹄與戰不利遂無進勦之意十月班師

提督容貌魁傑字量寬洪行軍臨陣鈴束得宜所過皆

便之以平壤功陞為太子太保祿加給祿米一百石賞

銀幣皇明實錄甲午因唐一鵬劾李如松如松疏辨言臣督領將士克平壤取開城又令李寧祖承訓等分道追趕直至王城遇賊齊出趣回碧蹄館為賊所因比臣隨兵止五百人遂突圍血戰賊乃遁歸蓋平壤之師主客相當開城之追勢如破竹而獨碧蹄猝遇眾寡不敵賊見我以寡勝彼遂悔罪乞款我得長驅克復皆碧蹄一戰力夫朝鮮必不能徒手而復倭奴必不應無故而歸今不覈平倭之實蹟獨稱碧蹄喪師冤陷特甚隴西李氏家乘丁酉四月土蠻寇犯遼東如松率輕騎搗巢中伏力戰死帝痛悼令具衣冠歸葬贈少保寧遠伯立祠謚忠

烈明史癸卯 昭敬王命建祠于平壤府燃蒸述 顯孝王

壬午從享 皇壇尊周彙編公子性忠死於甲申其孫萱

居淮陽 莊孝王戊申賜名源擢拜中軍命戶曹購第建廟因令不祧親撰祠堂記揭其楣日省錄

李提督票下官原本

方時春山西蔚州人以原任參將都指揮使司僉事

壬辰為李提督中軍隨提督來去原本

李寧遼東鐵嶺衛人初為寧遠伯家丁勇力與祖承

訓齊名壬辰以原任參將隨李提督來統親兵一千

積功至副總兵丁酉以欽差統領保定營兵備倭副

摠兵署都督僉事領馬兵二千南下戊戌四月擊賊

於居昌地遇賊伏中鎗卒原本○戊戌四月摠兵董一元夜襲泗川李寧被倭

所死鮮據此云居昌必誤

李逢陽以李提督旗鼓官出來丁酉又以備禦指揮

僉事隨楊經理來去原本

韓宗功遼東鐵嶺衛人或稱李提督婦夫云以原任

備禦隨提督出來原本天啓辛酉降將李永芳至義州

玉江堡搜殺避亂遼民宗功逃至義州遣官齎帖往

慰尊周彙編

楊元號菊匡定遼左衛人初以宋經略中軍移授中協

副摠兵官都督僉事壬辰隨李提督出來領二千兵共

破平壤賊未幾為經略叅劾革職同提督回去丁酉以

欽差備倭右翼副摠兵原任都督僉事出來住南原七

月被賊圍攻我國將士多死原本倭忽擁至南門遂入城

元驚起不及被衣跣足出脫傳報官寧國胤衣靴帶家

丁十八人逃出西門平據錄齊放四五馬所乘力疲則被

甲超換有若易席賊終不能害元長於野戰守城非才

而主將勒使保障終至於敗燃藜述竟以陷城之罪被繫

遼陽梟示軍前先是各將部分元當往忠州以忠州殘

破故與吳惟忠換地往南原終見翊原本

李如栢字子貞號背城提督之弟也壬辰以欽差征倭左營副摠兵官署都督僉事隨提督出來領兵一千五百共破平壤賊平壤既復提督將進討王京賊如栢苦止之提督回劄平壤一日議軍事厲聲責如栢曰耽閣大事至今不得成功皆由於汝云癸巳同提督回去本已未楊鎬四路出師如栢以一軍出鴉鵲關見虜兵二十人登山鳴螺如栢軍大驚奔潰言官劾之如栢懼遂自裁明史 藁

張世爵號鎮山廣東左衛人以欽差征倭右營副摠兵官都指揮使領兵一千五百壬辰隨李提督出來共破平壤賊癸巳同提督回去本

查大受鐵嶺衛人寧遠伯家丁也壬辰以欽差統領南北調兵原任副摠兵領馬步軍三千九月出來衛護行宮久住江上及李提督出來謀其票下碧蹄之役以先鋒斬倭百餘級于彌勒院前野癸巳隨提督回去本葛逢夏以欽差統領保直建遵調兵游擊將軍領馬兵二千壬辰十月以衛護行宮繼查大受出來久住義州甲午正月回去本

佟養正字子忠號蒙泉遼東衛人萬曆庚辰武進士壬辰之初出大兵也以欽差分守遼東寬奠等處副摠兵

官都指揮使來住義州清慎自將原本自七月初設撥兒

于順安與我國軍相進退寄齋雜記宋經略渡江令養正偕

其中軍王承恩往審鐵山海岸可設烟臺之地行到鐵

山郡人以花席遺之養正却不受後以事革職丁酉納

米贖罪出來我國服其清德為備百五十斛助之養正

悉以銀貨計直而還之以軍門聽用來去原本

楊紹先前屯衛人以欽差遼東總兵票下營領夷兵原

任參將領馬兵八百隨李提督出來癸巳十月回去原本

于有翼號心軒河南鄆陵籍鐵嶺衛人壬辰以欽差統

領遼兵原任副總兵領馬兵一千二百十二月出來癸

巳四月回去原本

孫守廉號杏村鐵嶺衛人壬辰以欽差鎮守遼東東路

副總兵都指揮使領馬兵一千十一月出來與李提督

最親平壤之戰不離提督左右癸巳五月回去原本

王維貞三萬衛人壬辰十一月以欽差統領薊鎮調兵

原任副總兵領馬兵一千出來癸巳七月回去原本

高策號對庭山西天城衛人壬辰十二月以欽差統領

馬兵二千出來癸巳九月回去丁酉以欽差薊遼軍門

管理中軍事務統領中協征倭兵馬副總兵後軍都督

府都督僉事隨邢軍門再來領薊兵二千五百赴島山

之役紀律嚴明管下軍卒如有掠人財物者必罪之而
還其主下營之地尤加鈐轄所過晏如原本

趙之牧以欽差統領昌平右營兵參將領馬兵一千壬

辰十二月出來癸巳四月回去原本

李芳春字應時號晴岡直隸大名府平虜衛人壬辰十

二月以欽差統領薊遼遵化參將領馬兵二千出來長

於騎射行軍之際道遇禽獸則輒翻身馳射獲之待士

卒以信賞不留時羣下愛之癸巳七月回去丁酉以欽

差統領遵化宣府二營兵馬右翼備倭副總兵都督僉

事領馬兵二千南下巳亥二月回去崑山之役芳春手

下所斬百餘級軍退經理留芳春于安東芳春嚴飭軍

丁不許侵擾招民還集勸勉耕種令其卒伍各葺房屋

勿令占奪民居廣設屯田軍民按堵零賊之出沒近境

者設伏遮擊前後斬獲五十餘級四月經理檄芳春移

南原始至官宇燬燼白骨山積芳春即坎瘞之運材作

公館居之曳橋之戰芳春由樂安進兵斬賊十餘級時

劉綖圍賊旬餘久不凌芳春語人曰當有別議未幾行

長撤去蓋綖用計退之而芳春知之也原本

李如梅字子清號方城提督之弟也壬辰以欽差義州

衛鎮守參將領馬兵一千隨提督出來癸巳十月回去

丁酉以欽差備倭左翼副總兵署都督僉事領遼東宣府二營兵一千四百七十出來戊戌二月回去原本

李如梧提督之弟也壬辰以欽差統領遼鎮調兵參將領馬兵五百隨提督出來癸巳十月回去原本

張應种壬辰十二月以欽差統領南北調兵涿州參將領馬兵一千五百出來癸巳四月回去原本

駱尚志號雲谷浙江紹興府餘姚縣人壬辰十二月以欽差統領浙直調兵神機營左參將領步兵三千出來督力絕人能舉千斤號駱千斤平壤之戰尚志先登賊從隙上滾下巨石中其腹尚志不為動奮身直上賊披

靡諸軍從之遂復平壤城標 莊孝王壬子追配武烈

祠耳溪集

張奇功遼東人壬辰五月以撫鎮差遣偕楊五典出來探審我國事情與沈惟敬相善聞惟敬與行長相見於釜山院而放行長還驚歎頓足曰若以一仗兵拿獲可不勞用兵而失此機會可惜蓋不知惟敬本情而云云也回去未久原本差奇功等發銀糴買芻糧搬到義州轉運沿路以濟軍餉細月十二月又以原任參將統領大寧營兵馬一千隨李提督再來癸巳四月回去原本 陳邦誓壬辰十二月以欽差統領山西營原任參將領

兵一千出來祭巳九月回去本原

吳惟忠號雲峰浙江金華府義烏縣人壬辰十二月以
欽差統領浙江游擊將軍領步兵一千五百出來甲午
正月回去丁酉以欽差備倭中翼副總兵原任都督僉
事領步兵三千九百九十六月渡江南下住忠州往來
嶺南勦賊已亥二月還王京四月回去惟忠性清嚴與
士卒同甘苦在嶺南多露處人勸入解舍答曰士卒暴
露吾何可獨安館宇號令明肅所過不折一草瓜蔬之
微必易以價嶺南一路皆立碑頌之避兵之民間吳軍
至則俱來集盡力供頓陳御史效知其材可任大將將

欲慰薦陞都督其門下人謂惟忠票下官曰以副將陞
提督當用五百兩金然副兵清白爾若以二百兩與我
事可諧惟忠聞之招中軍梁守忠責之曰我從此徑作
官吾之為大將固已久矣今豈可為此遂止本原

錢世禎號三池直隸蘇州府身江縣人壬辰十二月以
欽差統領山東秋班經略票下禦倭防海游擊將軍領
馬兵一千出來律已甚簡初破平壤諸軍爭搶倭貨世
禎獨歛軍不取祭巳九月回去本原

谷燧大同衛人壬辰十二月以欽差提督票下統領大
同營兵游擊將軍領馬兵一千出來甲午正月回去本原

周弘謨壬辰十二月以欽差統領宣府營兵游擊將軍領馬兵一千出來癸巳七月回去甲午以宣諭賊衆并來住王京未幾墮馬病卒原本

方時輝山西蔚州衛人壬辰十二月以欽差統領薊鎮游擊將軍領馬兵一千出來屬李如栢票下攻平壤有功久住尙州癸巳十月回去原本

高昇以欽差陽河游擊將軍壬辰十二月領馬兵一千出來癸巳九月回去原本

王問號義齋義勇衛人萬曆丙戌武進士壬辰十二月以欽差建昌游擊將軍領馬兵一一出來律身甚約所

過稱便癸巳十月回去原本

梁心以欽差保定游擊將軍壬辰十二月領馬兵一千出來癸巳十月回去原本

趙文明以欽差真定游擊將軍壬辰十二月領馬兵一千出來癸巳六月回去原本

高徹以欽差陝川游擊將軍壬辰十二月領馬兵一千出來癸巳六月回去原本

任自強字體元號冠山大同陽和衛人壬辰以欽差協守宣府東路統領營兵副摠兵官都指揮使領宣府兵一千十二月渡江癸巳八月回去巳亥以撫院聽用來

去本原

李平胡隄人李寧遠成樛異其貌收以為己子壬辰以欽差統領遼東調兵原任副摠兵署都督同知領馬兵八百隨提督出來癸巳十月回去本原

施朝卿以欽差山西游擊將軍壬辰十二月領馬兵一千出來癸巳六月回去本原

楊五與廣寧右衛人壬辰五月以原任副摠兵與張奇功出來義州探審我國事情回去丁酉隨邢軍門再來

本原宋大斌號養虛廣寧右衛人癸巳正月以欽差統領宣

大八衛班兵游擊將軍領馬兵一千出來甲午正月回去本原

戚金號蕭塘山東登州衛人自稱與戚東塘繼光為同宗云癸巳正月以欽差統領嘉湖蘇松調兵游擊將軍領步兵一千出來俄陞征倭副摠兵甲午正月回去本原

劉綬字子紳號省吾江西南昌府洪都縣人本原都督顯子也勇敢有父風用蔭為指揮使綬所用鑊鐵刀百二十斤馬上輪轉如飛天下稱劉大刀明史萬曆初從顯討

九絲蠻先登勇冠諸軍壬午擢游擊將軍平緬甸壬辰授五軍三營參將明史會朝鮮用師綬請率川兵五千

赴援明史癸巳二月以欽差統領川貴漢土官兵參將領

步兵原及吳惟忠分扼要口明出來俄陞征倭副摠兵

久住慶尙之大邱八莒縣自奉甚約時經大兵年饑民

散綆設法令軍中有餘米者悉買賣於我民以資其食

民賴以活原甲午三月移鎮南原燃九月還四川五

錄立碑于南原雜錄戊戌以欽差提督漢土官兵禦倭

摠兵官後軍都督府都督僉事再來征西路賊已亥四

月還原九月敕東征功次以綆曳橋之功陞授廕子賚

銀幣皇明實錄戊午 帝念遼警召為左府僉書明年二

月經略楊鎬出師綆兵由寬奠副使康應乾監之綆鎮

蜀人好用蜀兵久待不至遂行次淡河連克牛毛馬家

二砦虜兵守董鄂路聞綆軍至進戰綆縱兵圍數重虜

兵衆寡不敵潰圍出綆引軍登阿布達里岡將布陣虜

軍自高馳下奮擊綆軍綆戰死事聞 帝遣中使祭

陣亡將士恤綆家綆於諸將中最驍勇大小數百戰威

名震海內天啓初贈綆少傅世廕指揮僉事立祠曰表

忠明史光海君設壇於義州致祭尊周彙編

樓崇政李郁鄭自知胡鷹周易李杜吳希漢等七人俱

以李提督聽用官來去原

熊正東以守備壬辰出來往來釜山賊營回去原

傅廷立廣寧衛人癸巳以管糧來住平壤後以把截義

州再來原本

母承宣以哨探千總癸巳出來即回去原本

李有昇遼東鐵嶺衛人隨李提督出來碧蹄之役有一

賊揮劍突戰幾及提督有昇在傍挺身捍賊而死提督

遂免原本

樓大有吳夢豹李鎮寧國亂等四人或稱指揮或稱都

司隨李提督一行來去原本

張三畏遼東三萬衛人壬辰以遼東都指揮使司僉事

來住義州管糧律巳以簡人甚便之癸巳回去本年十

一月齋 皇勅來甲午正月回去原本

林世祿原本遼東鎮撫壬辰六月巡按遣來訶探燃蒸

又來許送援兵國朝

黃應暘壬辰七月以兵部差人同夏游擊徐一貫出來

盖 天朝疑我國與倭交通引以入寇論議紛然使

應暘等探訶也應暘到義州知我國被兵實狀對 王

滄泣曰貴國之情若是而不免 天朝之疑冤孰甚

焉即馳還告石尙書星曰朝鮮君臣奔越草莽寧以國

斃不忍負 天子之恩不可不發兵救之星聞而心

動乃上本請發兵討之迨致東方再造宋經略之來復

小華多矣 經籍卷之一

出來丁酉又隨楊經理來本原

譚宗仁壬辰隨李提督出來沈惟敬自釜山賊營回宗

仁癸巳十二月替惟敬在清賊營中不得出後以

計脫丙申二月回去本原

謝用樺號龍巖浙江紹興府餘姚縣人自稱太學士遷

之孫初以策士隨駱參將出來癸巳經略假以參將銜

與徐一貫稱天使入王城賊營開諭行長仍渡海至日

本而回丁酉隨邢軍門再來本原

徐一貫原本癸巳李提督使一貫謝用樺入郎古郎見

關白癸甲錄和漢三才圖會四月大明沈惟敬徐一

子

李大諫號北泉浙江嘉興府秀水縣人壬辰出來久住

江上丁酉隨邢軍門再來本原

吳宗道字汝行號石樓浙江紹興府山陰縣人由武舉

出身癸巳以後久住我國淡知事情每陳說於上司本原

聞倡義使金千鎰死晉州之戰遣使操文以辭之其辭

甚悲集丁酉又屬邢軍門仍統水兵而來戊戌回去

已亥又領水兵來久住江華本原江華人豎碑以寓去思

誌江都庚子十一月回去去後信問於我國卿大夫久而

愈款本原

小華多矣 讀高公

二十一

顧孫兩經略衙門原

顧養謙字益卿明史號冲庵直隸揚州府通州人原嘉

落有文武才兩朝平巡撫遼東著勲績以憂去排款議

者謂養謙必能辦倭故癸巳十一月 帝起為兵部

侍郎經略朝鮮明史代侍郎宋應昌甲午我國差陪臣

許頊奏倭情反覆和不可恃時養謙在遼東止頊不許

前進即遣參將胡澤于我國令改其奏姑請講好我國

不獲已改本付頊奏聞養謙亦上本極陳賊情乞解軍

務言者論其主和是年五月回部管事原

孫鑛字文融明史號月峰原尚書陞子明史浙江紹興

府餘姚縣人原萬曆甲戌會試第一有文名為吏部考

功文選郎澄清銓法名藉甚明史甲午以兵部右侍郎

代顧養謙為經略原乙未鑛令葉靖國持檄諭行長還

報行長無撤兵意鑛乃上疏言倭情多詐且聞山城君

尚在有文祿三年曆可証關白當如禮臣議改封順化

王責關白子或行長親持誓表詣遼陽然後命李宗城

往使而罷遣沈惟敬仍增募水陸諸軍嚴為之備又聞

關白與行長不相能或以計招之亦一策也石星言鑛

不宜遣人入倭沮壞封事鑛乃作封貢議以諷星亦不

聽明史丁酉四月楊方亨始直吐本末星進呈書揭十

五紙語涉督臣陰事皇明實錄帝以鑛遜避觀成敗亦

罷免明史顧孫兩公俱到遼東不渡江本原

封倭冊使諸官一行往來各衙門本原

李宗城臨淮侯言恭子也本原岐陽王之嗣孫少以文學

知名公卿間萬曆中倭犯朝鮮發兵救之不利兵部石

星聽沈惟敬言主封貢薦宗城才授都督僉事以正使

持節往封都督府僉事楊方亨副之惟敬先驅渡海宗

城等遷延朝鮮境上倭揚言如約受封比至金山倭來

益眾道路藉藉言且劫二使宗城恐日夜滄泣惟敬又

為流言脅之宗城遂變服逃歸而方亨渡海大為倭所

辱竟不成封宗城下獄論戍明史

楊方亨山西人號泰宇武進士出身乙未四月欽差冊

封日本副使左都督府署都督僉事出來是年十月入

倭營當上使李宗城逃去之日倭賊以兵圍方亨所館

方亨靜以待之日高猶未起行長令通官告正使逃去

方亨口癡人未見異國氣色久在營中悶不可耐以此

逃去矣因呼行長義智等令毋侵暴票下將官初方亨

入倭營倭酋入庭行禮方亨謂行長曰大明中天天下

一統萬國誰不仰服爾關白雖在海外安敢獨不效順

乎爾等領兵據此已踰四年 皇上深悶生民塗炭

特遣詔使遠臨海外是萬古所未有之一大慶也爾等何故迄未過海因厲聲抗言諸倭相視肅然至是咸遵其節制一營賴之六月往日本秀吉接之甚倨封事亦未諧十二月自日本返丁酉正月回去方亨初回上本以為秀吉深順詔旨石星喜之及科道力攻和議方亨旋又上本斥和星大怒劾方亨反覆原本帝以方亨反覆小人本當重處念其遠使辛弊姑令革職永不敘

用皇明實錄

沈惟敬者嘉興人頗習倭事原本沈惟敬者或言浙人浙直總督胡宗憲票下用間謀場殺倭象因此備請倭國事情上書于兵部請往諭倭如尚書石星奇之薦于

朝彼游擊號差往朝鮮偵探賊情且許便宜從事詭譎無賴以秘策干兵部石

星星遣之入倭營還言行長願還侵地請封貢以去平

壤為信星大惑之明年春李如松襲取平壤明史諸倭

聚王京經略宋應昌令惟敬再入賊營諭退其眾四月

初九日惟敬自江華乘船到龍山清正行長俱會於船

上各請和惟敬諭之曰爾等還王子陪臣斂兵南去則

封事可成大將秀家等約於十九日收兵回去即搭造

浮橋於漢江諸酋俱退去清正獨不還王子陪臣惟敬

與徐一貫謝用梓偕行長等南下五月初三日到釜山

惟敬合秀家等稟關白移置王子於行長營即與倭將

八 卷之二
飛彈守久大夫等七月至王京如松曰爾等雖請款朝鮮二王子猶未還將何以復命飛彈守即請差官往金營取回王子如松遣家丁婁國安齋諭帖及飛彈守手信往取二王子還十一月兵部再令惟敬入金山宣諭倭將速撤兵且修降表而來惟敬入金山甲午正月得關白降表二道將吏國人請立秀吉爲王結狀十五道詣遼陽其表文措語疑非日本文字也指揮李英春又偕小西飛彈守入朝兵部信惟敬之言以爲賊悉奉朝命題請封貢科臣力爭不可兵部請差二科臣前往朝鮮問倭之有無然後發使准封而陪臣許頊適賚原請

封倭奏

國朝寶鑑

本至兵部大喜定議題請封貢遂遣冊使

往封秀吉乙未惟敬隨冊使出來先入倭營則倭衆猶據海上矣丙申四月正使李宗城逃回惟敬陞爲副使七月二使渡海入日本秀吉待二使不以禮辭語悖慢封事遂不諧二使還渡海方亨先回去惟敬托稱奉勅待事完乃回仍住慶州宜寧之地屢使人入金營其所猷爲人莫得知丁酉八月賊陷閑山島 天朝慮惟敬交通倭賊透漏軍機且恐躲入賊中密令楊元捕獲械送 天朝惟敬以厚貨賄蕭應官冀上本救已應官以書抵邢玠揚鎬惟敬可保無他玠見之大恠乃以

應官書奏之遼東巡按聞之奏參應官革職惟敬繫錦衣獄三年論乘市原本○原本以石尚書係之於此今特移揭於卷首以釐之

冊使票下官原本

中軍指揮僉事王承烈原本

旗鼓官原任守備陳金原本

管糧守備楊貴祿原本

贊理經歷項汝變原本

相公俞承宗能文工書原本

金嘉猷上使楊方亨千總朱璧沈惟敬票下原本丙申閏八月隨兩使至日本夜地大震兩使所館亦壞

嘉猷璧及家丁四人皆死西厓集

吳邦彥原本探倭委官乙未十二月沈惟敬私令邦

彥等將遼東寬奠官馬及京營選鋒馬二百七十七

匹云備從人騎用悉送日本南戈壁喂養實以驅獻

關白也平攘錄

王世賢徐延壽原本皆冊使把摠丙申四月正使李

宗城變服逃去世賢等續後亦去皇明實錄

王吉原本丙申八月兵部題指揮官王吉齋奉符節

誥勅冠服等件到梁山皇明實錄

徐志登原本護勅官平攘錄

陳雲鴻以欽差宣諭游擊將軍甲午十月出來乙未隨冊使入倭營丙申從楊方亨回去原本

胡大受稱為教鍊游擊乙未七月出來十二月回去原本

余希允原本策士乙未冬奴兒哈赤將乘水寇我游擊

胡大受遣希允與我國申忠一往探虜情尊周彙編

葉鱣以軍門委差丙申正月出來丁酉二月回去原本

王德吉陝西人丙申以山東兗州府同知管自在州知

事出來禁約撥軍挈送逃兵甚多後又以管糧留黃海

道久而乃回去原本

刑軍門以下諸官一時往來各衙門原本

邢玠字式如明史號昆田山東青州府益都縣人原本謹

重有識略事必熟慮圖全不為苟且平攘錄隆慶辛未進

士丁酉以欽差總督薊遼保定等處軍務經略禦倭兼

理糧餉兵部尚書兼都察院右副都御史代孫鑛十月

渡江戊戌三月回去七月復來住于王京性寬和凡軍

務一聽於楊經理島山之役南將頗咎經理至請奏參

玠不從及丁應泰上本誣參經理本國差李元翼齎奏

申救經理玠時自遼東出來見元翼於鳳山密語曰楊

公力擔東事反遭非情之謗陪臣之去正當機會可亟

往申奏毋誤及應泰又參軍門之失玠無幾徵見邑終

不相較是年冬四路提督一時進兵東路之賊先撤回中路失利西路不戰而去海路奏捷於是玠上本留萬世德杜潛李承勛等為善後計以己亥五月回去本原玠之經略朝鮮執沈惟敬戰蔚山斬首萬級賜尙方劍得誅大將以下擊倭於錦山南海間殲石曼子擒平正成等焚其舟九百艘論功加太子太保蔭錦衣衛指揮僉事世襲賚銀八十兩大紅紵絲蟒衣一襲給誥命朝鮮為立生祠像標銅柱釜山頃之力請養毋前後十四上乃可後復起南司馬終不出臨卒有遺疏言破黨用人發帑罷稅數千言為人易直能肩艱難卒以功名終樹

聲海外殆鮮其儔矣

皇明實錄

邢軍門票下官

原本

戴延春號小泉陝西寧羌衛人以中軍都督僉事戊

戌七月隨軍門來同軍門回去

原本

蔣弘濟號靜吾浙江紹興府會稽人以原任守備為

中軍旗鼓官隨軍門來去

原本

楊廉號小芹陝西綏德衛人以邢軍門票下騎兵左

營守備參將體統行事都指揮僉事領官兵九百九

十出來同軍門回去

原本

龐渤以聽用官隨邢軍門出來仍為麻提督旗鼓官

本原

葉思忠號仰川浙江金華府義烏縣人以原任游擊

隨軍門來去本原

喬一麟號紹齋順天府大興縣人以原任游擊隨軍

門來去本原

宗應魁直隸密雲衛人以原任指揮隨邢軍門來去

本原

張彥池號左泉山東青州衛人隨邢軍門來去本原

張隆以票下騎兵指揮領馬兵七百六十隨邢軍門

來去本原

董用威提督一元之姪以票下游擊領勇兵三百隨

邢軍門來去本原

斯天爵以永平後部千總領馬兵七百隨邢軍門來

去本原

王成以左營千總領步兵一千一百五十隨邢軍門

來去本原

王宗義以大同委官領馬兵九百八十隨邢軍門來

去本原

蔡仲宇以遼兵營指揮領馬兵七百六十隨邢軍門

來去本原

李國輔以右營千總領兵八百八十隨邢軍門來本

于承恩揚貴原本丁酉十一月軍門邢玠委把總楊

貴嚮導承恩統領銃手二百長箭手一百與機張島

李應龍俟賊接戰則鳴鼓為疑兵賊潰散則揚帆為

正兵平據錄

董漢儒號誼臺直隸大名府開州人萬曆己丑進士丁

酉十二月以欽差管理備倭糧餉戶部山東清吏司郎

中出來戊戌正月還義州己亥四月陞開原兵備回去

輪轉之際務從便宜浹知我國物情所稟無不曲從自

奉簡約義州人至今稱之原本九月論功陞職賚銀皇明實錄

天啓二年以工部左侍郎協理戎政又擢兵部尚書時

毛文龍居海外屢以虛言誑中朝漢儒言文龍計畫疎

虛聲未可長特進太子太保卒贈少保諡肅敏明

揚位號錦溪河南府汝寧府人萬曆庚辰進士丁酉以

欽差贊畫軍務兵部職方清吏司員外郎出來行到定

州聞陞授寧前兵備回去本

丁應泰湖廣武昌府江夏縣人亦以軍門贊畫戊戌正

月出來五月回去九月再來己亥三月回去為人兇岐

島山之役聽人誣毀上本參楊經理我國救之應泰移

怒於我以我國為與倭交通以申叔舟海東紀為證賴

天子明聖得無他吏科都給事中趙完璧劾應泰革職原

楊萬兩經理以下諸官一時往來各衙門

楊鎬號滄嶼河南遼德府商丘縣人有俠氣遇事敢爲性又疎宕不拘小節持身峻潔萬曆庚辰進士丁酉六月以欽差經理朝鮮軍務都察院右僉都御史出來往平壤九月到王京十二月下蔚山戊戌三月回到王京六月被參回去自渡江嚴立鈐轄操束所過地方日食蔬菜亦皆撥銀買辦時賊已破閑山三路來侵南原失守楊元敗走李提督諸將皆思捲退經理獨凌計進前

倍日馳赴王京軍情乃安已而賊敗于稷山經理親率大軍先攻清正於島山躬擐甲胄上陣督戰初破太和江進圍島山城險不能猝拔過十餘日會天大雨士馬疲凍引還安東分屯盧得功茅國器兩將之兵於星州李芳春牛伯英兩將之兵於南原以備不虞又遣麻提督於安東申飭各營以待秋間三路齊舉先是浙江游擊陳寅中軍周陞爲人狡詐島山之戰得罪於鎬心銜之譖於丁應泰曰島山之役遺棄資糧器械無筭天兵死者甚衆以軍中帶來雜役及買賣人等頂補其餒乾沒餉銀不分給各營軍馬絕糧屢月應泰將參之故詣

經理鎬原本示以閣老張位沈一貫手書揚揚詡功伐應

泰抗疏盡列敗狀并劾位一貫扶同作奸 帝震怒

欲行法首輔趙志臯營救乃罷鎬令聽勘明史及其還

也都民男婦皆出祖郊外立碑頌之原本東征事竣敘鎬

功詔許復用戊午廷議以鎬諳遼事起經略明年正月

定議出塞杜松軍盡覆馬林敗遁劉綎戰死京師大震

言官交章劾鎬逮下詔獄論死明史

楊經理票下官原本

彭友德字秀卿浙江省杭州道吳江縣人麻氏以中

軍副摠兵署都督僉事隨經理出來同經理去原本追

倭至青山獲百餘級再造藩邦志

李開先以旗鼓官守備指揮僉事領馬兵一千五百

二十隨經理來仍為萬經理旗鼓同回去原本

劉仲武以指揮領馬兵一百隨經理來去原本

李友勝以遼營親兵千摠領兵八百隨經理來同回

去原本

李益喬以統領坐營調兵千摠領馬兵一千二百九

十隨經理來去原本

章煥然以寬奠中軍隨經理來去原本

萬世德號震澤山西太原府偏頭所人隆慶辛未進士

戊戌以欽差朝鮮軍務都察院右僉都御史代楊經理十一月渡江本原以檄諭倭將淡明關白不道島民無罪倭將見檄文頗亦感動平壤聞三路之賊俱已捲迥惡差官馳審軍前已交軍門奏留之經理乃留王京王京姓名記八月率文武將吏登金山刊石勒銘金山庚子十月回去本原

萬經理票下官本原

俞尙德號左川宣府前衛人以中軍原任副總兵都指揮隨萬經理來已亥正月先回去本原孫邦禧隨萬經理來代俞尙德為中軍同經理回去

本原

郭朝亨以把總管千戶領馬兵五百五十隨萬經理

來去本原

鄭全斌以天津營領兵千總領步兵二千隨萬經理

來去本原

王在沼以票下委官領馬兵三百八十隨萬經理來

去本原

洪居高以旗牌官指揮號頭領馬兵二百三十隨萬

經理來去本原

陳效字忠甫號岷麓四川成都府井研縣人庚辰進士

丁酉十二月以欽差禦倭監察遼海朝鮮等處軍務監察御史受命查勘東征功罪出來過江聞楊經理圍島山分遣千總歐陽紹李鶯等督戰于諸路效亦兼程馳往戊戌正月到王京島山兵退無以驗功三月還遼東九月還出來十月到王京十一月南下至新寧聞倭遁去與徐給事丁主事相先後遍巡島山釜山南原全州各營住軍處已亥正月還與邢軍門以下諸衙門行驗功宴二月二十二日暴卒時傳言為劉綎所鴆云原本敘稷蔚功效廕一子錦衣明紀本末

一陳御史粟下官原本

潘嘉言以經歷隨陳御史來原本

梁材以中軍指揮隨陳御史來原本

惠虞以斷事官隨陳御史來原本

徐觀瀾號涵碧山西澤州人萬曆己丑進士戊戌丁應泰誣奏楊經理天朝遣給事查驗軍額存亡且勘會軍功九月以欽差查勘兵科左給事中出來十一月下嶺南巡視四路軍兵已亥正月還到王城二月回去給事與應泰頗親而及應泰搆我國也給事若不聞者及至軍前從容驗問據實具奏經理得無他我國被誣之狀亦一一分疏舉國咸服其明性溫雅清簡我國禮

物一無所受每閉戶讀書衙門寂然本

楊應文號鳳麓直隸常州府無錫縣人己丑進士戊戌以欽差查功刑科都給事中代徐給事勘會軍功已亥三月到江上聞軍門以下皆回董郎中及邢軍門皆言本國物力方屈諸將若復會王京將無以支給事遂無東意閏四月初二日渡江到義州諸衙門競送禮物軍門經理外皆却不受諸將領納謁皆不接一日劉綎來到軍門給事將出使人唱曰今日與邢萬兩衙門相會議事異日可來綎奔避脅息不敢出各衙門使人探聽者皆嚴戢之衙門聞如我國禮物亦不受查勘之日與

軍門經理會于統軍亭諸將爭進訟功給事凝然不動曰到遼當勘未知其究如何其回渡江也直就船上提督以下諸將就拜之給事下轎一揖以去本

蕭應宮號觀復直隸蘇州府常熟縣人甲戌進士丁酉七月以欽差整勅遼陽等處海防兵備山東按察使出來時沈惟敬被罪拿去應宮申救惟敬語在惟敬傳中遼東巡按劾之削職九月回去本

蕭按察票下官本

劉天秩遼東東寧衛人從蕭按察為中軍仍為梁按察中軍去本

張登雲號浩宇山東兗州府慶陽人隆慶辛未進士丁

酉六月以欽差分守遼海東寧道帶管防海道事河南

布政使司右參議原督運火器火箭鈔子兩朝平出來

七月回去本

王士琦字圭叔號豐嶼浙江台州府臨海縣人萬曆癸

未進士戊戌六月以欽差禦倭西路監軍山東布政使

司右參政出來八月十九日南下劉綎陳璘皆轄焉九

月初六日還王京會軍門議軍事二十六日進住南原

龍頭山督諸軍催運糧十一月初六日劉綎左次王之

翰司懋官等先退參政聞之遣旗牌官將斬而梟示綎

知之上衆軍于順天故城時軍門欲圍行長於曳橋先

以舟師往擊南海之賊覆其巢穴斷賊歸路令參政相

機進止參政與劉綎議綎不可參政乃止行長遁參政

隨綎入遍視賊壘回南原十二月回星州正月還王京

四月回去本

王參政票下官本

左繼高凌翰二人俱以中軍守備隨王參政來去本

吳從周泗川敘南衛人以左營都司領步兵三千隨

王參政來去本

梁祖齡號景泉四川成都府溫江縣人萬曆丙戌進士

戊戌以欽差整勅遼東寬奠等處海防兵備兼理朝鮮東中二路軍務山東布政使司右參議兼按察使僉事出來往來嶺南能鈴東下卒所過晏如本原

杜潛字孔昭號見田山東東昌府高唐州人庚辰進士已亥四月以欽差協理海防兵備山東按察司副使出來庚子十月回去持身簡約本原

杜按察票下官本原

梁守忠字汝孝號海宇浙江觀海衛人曾從吳惟忠出來仍為杜按察中軍同按察回去本原

徐中素號玉淵江西南康府建昌縣人萬曆乙未進士

戊戌五月以欽差禦倭東路監軍兵備山東按察使司僉事贊畫主事出來六月間父喪回去本原

徐監軍票下官本原

鄒良臣江西南昌衛人以徐監軍中軍領馬步兵二千七百九十來去本原

陳登以管糧原任同知丁酉十月出來戊戌六月回去本原

韓初命字康侯號見宇山東萊州府掖縣人已卯舉人戊戌八月以管糧同知出來庚子十月回去本原

吳良璽以原任鹽運司同知戊戌六月出來已亥三月

回去本原

黎民化以管糧戊戌八月出來已亥三月回去本原

李培根宋一魁黃三台吳瑞麟羅敷教吳道行沈有孚

王三善秦自治劉正倫王官生黃繼後趙子政王立民

梁瑞等十五人俱以管糧聽用等官往來本原

四路提督以下諸將官及善後留住將官一時

往來各衙門本原

董一元號小山宣府前衛人丁酉十二月以欽差提督

中路禦倭摠兵中軍都督府左都督太子太保出來戊

戌領中路兵進勦泗川之賊不利本原奪宮保貶秩三等

明史 已亥四月回去本原是歲敕東征功次以一元罪不

掩功復原職資銀幣皇明實錄

董提督票下官本原

方時新時春之翁以中軍守備隨董提督出來戊戌

十月病卒於星州本原

葉思義字元宰號效川浙江金華衛人以坐營守備

代方時新為中軍本原

麻貴號小川大同衛人其先回回人本原父祿有功為宣

府副摠兵貴從軍積功萬曆擢摠兵官尋病歸明史丁

酉六月以欽差提督南北官兵禦倭摠兵官後軍都督

府都督同知出來與楊經理攻島山我兵多傷於砲丸
滅險難拔提督請開一面使賊得遁設伏於要路以邀
之經理不聽後竟無功再征東路時賊通書於各衙門
他將皆受之獨提督不肯墀見輒焚之曰朝廷欲令講
和則一能言之士足矣何用我輩領十萬軍來耶提督
容貌雄偉鐵面華髮顧眄有威風望之知其為大將也
持身簡約公路便之本原戊戌至蔚山倭誘入其空壘伏
兵起遂敗明紀本末已亥四月回去本原是年敘東征功次以
貴功浮於罪陞授廕子賚銀幣實錄貴果毅驍捷善用
兵東征西討并著功伐稱一時良將焉麻氏多將才人

以方鐵嶺李氏曰東李西麻明史

麻提督票下官本原

張維城字國柱號紹川大同中衛人以中軍指揮僉
事領馬兵一千六百二十隨麻提督來去本原

沈棟號對樓大同威遠衛人以隨營參將代領陳愚
秉軍隨麻提督回去本原

鄭印以領兵都司領馬兵二千五百隨麻提督來去本原

梁釁以宣府兵營千總衛鎮撫領馬兵五百隨麻提
督來去本原

王勘定以坐營領兵五百隨麻提督來去原本

劉提督前見票下官原本

盧世卿字表德號紹溪江西南昌衛人丁酉以中軍

守備隨劉提督來去以簡約稱原本

陳以竺字執甫號靖宇江西南昌衛人丁酉以專管

火器中軍指揮僉事隨劉提督來去原本

周敦吉字憲甫號駟橋四川寧州衛人原係苗氏丁

酉統夷兵為票下第四營指揮同知領川貴漢土兵

三千一百四十驍敢善戰劉提督甚愛之一日與陳

以竺相失礪刃放砲率眾直前攻之以竺窘甚提督

躬自救之得解原本

陳大綱丁酉以票下千總領步兵三百九十隨劉提

督來去原本

參游吳文傑府佐李培汪京原本丁酉五月軍門邢

玠令文傑等三員各領一枝而以臨洮大將劉綖統

之并用吳良璽李培汪京三員隨營專管約束皇明

陳璘字朝爵號龍厓廣東羅定州東安縣人原本明史

源有謀略善將兵然所至貪黷為巡按所劾褫官廢朝

士多惜其才丁酉封事敗明史戊戌以欽差統領水兵

禦倭摠兵官前軍都督府都督僉事六月出來征勦水

路之賊時分四路出兵而東路不戰而賊已遁中路失利西路行計潛和惟水路大捷李舜臣與都督同征倭而中丸以死都督哭之慟賻贈甚厚入哭于靈柩吊其妻子而去原論東征功進璘都督同知世廕指揮使資銀幣乙巳鎮廣東卒於官贈太子太保明史

陳都督票下官原

陳九經都督子也以坐營都司領兩廣水兵二千露梁之戰賊攀都督之船幾及都督九經以身捍之至被賊刺猶不動旗牌官文煇以鎗鉞刺其賊九經得免原

沈璨以坐營指揮中軍領步兵二千隨陳提督來去

原

張汝文號

號二

以票下廣東營千總領狼土兵四千

五百九十隨陳提督來去

原

王元周號敬南蘇州府太倉衛人以票下游擊領水兵二千戊戌九月來住古今島已亥三月回去原

李承勛字錫庸號景山浙江處州衛人以欽差提督領南北水陸官兵朝鮮防海禦倭總兵官左軍都督府都督同知已亥七月出來庚子十月回去以善後之任留王京自持甚恭無擾害之弊原

李提督票下官原本

梁朝選以中軍統領沙兵隨提督來去原本

賈祥以左營都司已亥六月先提督出來庚子七月

回去原本○廢弁賈祥浙人也素疏扈及遼陽陷沒

承蘇公即不與將鼓衆為脫中之呼蘇公虞有變乃

與半月餉祥至吳江縱兵剽掠槍棄未畜城門晝閉

自吳江以北諸所經郡縣咸設備以待祥渡江以北

淮揚東亮在在苦之抵涿鹿有旨逮祥繫詔獄蘇州

周以德以票下中軍守備領官兵三千二十隨提督

來去原本

周冕號冠吾金華衛人初隨軍門出來領浙兵三千

住王京與周陞相善經理被參歸咎於陞陞遂被囚

冕怒糾聚浙兵將攻經理經理開門持之彭友德許

國威等擐甲勒兵以待陳寅至諭解之乃釋後為李

提督旗鼓官隨征中部千總領步兵二千五百隨提

督來去原本

陳希聖以旗鼓千總隨提督來去原本

楊副總元見票下官原本

李新芳丁酉以中軍千總領馬兵三千七百五十來

原戰死南原再造藩

蔣表毛承先原本丁酉以千總守南原倭遂入城表

承先皆死之再造藩

李副總前見 票下官原本

李藥丁酉以遼營親兵把總率家丁六百來去原本

李副總芳春見前 票下官原本

陳國寶丁酉以東路坐營指揮領馬兵一千來去原本

吳廣號少武廣東韶州府英德縣人極以武生屢著戰

功翻史 戊戌以欽差統領雲貴廣東漢土官兵副總兵

署都督僉事領狼土兵五千五百出來八月南下曳橋

為先鋒已亥三月回去原本廣鎮四川踰年卒贈都督同

知世廕千戶史明

曹希彬字子原號南懷四川成都後衛人戊戌以欽差

統領川貴官兵副總兵署都督僉事領步兵二千八百

九十出來已亥三月回去原本

曹副總票下官原本

王名世以中軍出來原本

解生字文英號順泉宣府前衛人丁酉以欽差備倭左

翼副總兵署都督僉事領大同馬兵二千五百七月出

來八月下水原擊賊九月南下已亥八月回去驍勇善

戰臨陣必先登鉉束甚嚴性又恭謹每謂國人曰我以

捷軍誤蒙國恩抗禮於千乘之君豈敢承當於 王接

待輒俯伏盡酌拜起甚恪原本

鄧子龍豐城人貌魁梧驍捷絕倫兼通翰墨明史以欽

差備倭副摠兵署都督僉事領水兵三千戊戌六月從

水路九月到古今島原十月偕統制使李舜臣督水軍

駕三巨艦為先鋒邀之金山南海子龍素慷慨年踰七

十意氣彌厲欲得首功惡携壯士二百人躍上朝鮮舟

直前奮擊賊死傷無算他舟誤擲火器入子龍舟舟中

火賊乘之子龍戰死舜臣赴救亦死事聞贈都督僉事

世廕一子廟祀朝鮮明史

盧繼忠號仰雲浙江處州衛人以欽差統領南北調兵

五軍四營參將都指揮使領馬步軍二千七百七十丁

酉十一月出來戊戌三月回去原

楊登山字愷明宣府懷安衛人以欽差協守東路參將

都指揮使領馬兵一千二百丁酉出來已亥三月回去

勇敢善戰臨戰必先登原

李寧字以德號南國大同陽和衛人以欽差統領大同

營兵西路參將都指揮同知領馬兵二千六百四十丁

酉十一月出來已亥三月回去原

王國棟號忠庵陝西延安府綏德衛人以欽差統領延

綏前營參將都指揮僉事領馬兵二千一百二十戊戌

正月出來已亥二月回去原

楊紹祖號一峰前屯衛人紹先之弟以欽差保定中營
參將都指揮僉事領馬兵一千七百八十戊戌六月出
來已亥二月回去其票下范進忠亦領兵五百來標
陳愚聞以欽差遵化營兵參將都指揮僉事領馬兵一
千四百九十丁酉十月出來島山之役以先鋒分守東
南隅領家丁先登手自斫賊又放大砲及火箭破賊船
經理獎其壯勇以城西地險命移其軍攻之愚聞先入
柵中已而中丸昇歸得不死戊戌六月回去標
王之翰號石巖四川晉安衛人以欽差湖北川東畢郎
營兵游擊將軍都指揮同知領四川步兵四千戊戌六

月出來已亥四月回去標

頗貴字世傑號晉川宣府右衛人以欽差統領宣大調
兵原任游擊將軍都指揮同知領馬兵二千八百丁酉
八月出來已亥三月回去勇健善戰與解生楊登山擺
賽齊名號四將標
柴登科字仰元號汲泉以欽差密雲前營游擊將軍都
指揮同知領馬兵一千三百五十丁酉九月出來已亥
四月回去標
茅國器號行吾浙江紹興衛人武進士出身以欽差統
領浙勝營兵游擊將軍都指揮同知領步兵三千一百

丁酉九月來已亥十月回去住星州時招諭流民屯田
鍊卒未幾敗於泗川使吏世用往來賊營及賊退自以
為功本原

葉邦榮丁酉領浙兵一千五百來去本原

葉朝桂千總領步兵二百四十來其屯住龍宮能戢下
民甚便之本原

陳愚衷以欽差統領延綏營兵游擊將軍都指揮同知
領馬兵一千九百丁酉六月出來九月被拿去愚衷在
全州南原被圍乞援終不應全州亦被屠戮經理參奏
棍一百減苑充軍本原

秦得貴號北山鐵嶺衛人以欽差撫院聽用原任游擊
將軍都指揮同知領宣鎮馬兵六百六十丁酉十一月
出來已亥二月回去本原

傅良橋號約所江西撫州金谿縣人武進士以欽差統
領南贛汀韶兵游擊將軍都指揮僉事領步兵二千戊
戌九月出來已亥三月回去本原

許國威號允直福建晉江縣人武進士以欽差統領福
營游擊將軍都指揮僉事領步兵一千一百六十戊戌
三月出來已亥四月回去能文詞有氣義與楊經理最
親經理被叅國威率諸將官上本申救本原戊戌倭遁國

威退軍南海燃蒸

司懋官號建庵四川夔州衛人以欽差統領建昌都司

營兵游擊將軍都指揮僉事領步兵三千一百票下陳

信領步兵三百三十戊戌六月出來已亥三月回去懋

官性剛不奉主將之令曳橋之役與王之翰允遁原

牛伯英號少川保安衛人以欽差統領薊鎮票下三屯

中右營游擊將軍都指揮僉事領馬兵六百丁酉七月

出來已亥四月回去曳橋之役伯英知劉提督不欲戰

勸勿交鋒因是退舍原

馬呈文字弘宇號紫院宣府右衛人以欽差統領河間

營兵游擊將軍都指揮僉事領馬兵二千戊戌八月出

來已亥正月潰于泗川坐是革職回去原督撫邢玠疏

參詔斬呈文以徇皇明實錄

師道立字國化號西園大同右衛人以欽差統領右掖

兵游擊將軍都指揮僉事領步兵二千四百八十戊戌

五月出來已亥以泗川之敗革職回去原

李化龍號雷門保定中衛人以欽差統領保定兵游擊

將軍都指揮僉事領馬兵二千五百丁酉十月出來島

山之戰以觀望不前綁示軍前參奏革職原

陳蠶號見塘浙江金華衛人以欽差統領五軍四營南

兵游擊將軍都指揮僉事領步兵三千戊戌十月出來
已亥三月回去御下有法度本原

揚萬金山西太原人以欽差統領大同兵游擊將軍都
指揮僉事領馬兵一千丁酉十月出來島山之戰手執
金鼓登城力攻中丸而墜昇歸道卒本原

擺賽號西河大同右衛人與頗貴解生楊登山俱是捷
將而賽最勇丁酉八月以欽差統領宣大招募夷兵游
擊將軍都指揮僉事領馬兵三千出來島山之戰功最
大經理將回軍賽獨請沒戰經理不從賽橫卧馬上不
起作歌風之戊戌正月疾卒本原 王命停朝市二日朝國

寶鑑

盧得功以欽差統領三營屯兵游擊將軍都指揮僉事
領馬兵三千丁酉十一月出來戊戌十月戰亡於泗川

本原

郝三聘字汝賢號龍泉大同府平虜衛人以欽差統領
大寧都司入衛春班游擊將軍都指揮僉事領馬兵一
千戊戌八月出來已亥正月以泗川潰敗革職本原詔斬
三聘以徇皇明實錄

陳寅號賓陽浙江温州府金鄉衛人以欽差統領薊鎮
末平添防南北官兵游擊將軍署都指揮僉事領步兵

三千八百五十丁酉十一月出來島山之役中凡昇還

王京出資立關王廟於南大門外已亥四月回去本原

沈懋以欽差統領廣東水兵游擊將軍署都指揮僉事

領水兵一千戊戌十月出來已亥四月回去本原

福日昇直隸揚州衛人以欽差統領山東直隸水兵游

擊將軍署都指揮僉事領水兵一千五百戊戌九月出

來以未及師期論白衣從軍有功於露梁之戰還其職

已亥四月回去本原

薛虎臣號萍溪直隸保定府定興衛人以欽差直定營

坐營官都指揮同知領馬兵三千丁酉十二月出來戊

戌南下已亥四月回去本原

俞明德涂明宰盧應奎茅明時程鵬起白鑛等六人或

以聽用或以管糧來去本原

張榜浙江人以欽差統領浙江備倭都指揮使領步兵

四千六百已亥出來庚子回去本原

白斯清字可相號我澄福建泉州衛人以欽差統領福

建水兵禦倭游擊將軍都指揮僉事領水兵一千六百

已亥四月出來庚子三月回去本原

藍芳威號雲鵬江西饒州府江西縣人以欽差統領浙

兵游擊將軍署都指揮僉事領南兵三千三百戊戌正

月出來標王移揭曰晉泗之賊踰入全羅出沒焚掠

湖嶺騷然節下提孤兵扼強寇大鏖兇鋒使殘民脫於

虐燭天兵賴以增氣寡人驚怖感激不知所言期沙已

亥七月回去標

徐成號少川浙江金華衛人以游擊將軍領水兵到江

華病還季金代之標

季金字長庚號龍岡浙江台州府松門衛人以欽差統

領浙直水兵游擊將軍署都指揮僉事領水師三千二

百丁酉十月由海路到古今島露梁之捷斬獲頗多已

亥四月回去標

涂寬以欽差統領廣福調兵擊將軍署都指揮僉事

領步兵八百五十丁酉十一月出來戊戌八月回去標

安立本號卓吾廣寧人以欽差統領宣府營兵游擊將

軍署都指揮僉事領馬兵二千五百丁酉十月出來戊

戌三月回去標

梁天胤號念泉直隸淮安府大河衛人以欽差統領南

直水兵游擊將軍署都指揮僉事領水兵二千戊戌七

月出來已亥四月回去標

王國威以欽差統領崇明沙兵游擊將軍署都指揮僉

事領沙兵一千戊戌十月出來庚子二月回去標

張良相號樂齋杭州右衛人以欽差統領浙江水兵禦倭游擊將軍都指揮僉事領水兵一千五百已亥出來庚子十月回去原本

李天常字惟敬號靈峰浙江紹興府山陰縣人武進士初以欽差千總領水兵二千七百出來露梁之戰斬倭二百六十九級奪回被擄人三百餘口論功陞游擊庚子十月回去原本

李香號蘭臺浙江前衛人以欽差統領南北禦倭提督票下坐營游擊將軍都指揮僉事領南北兵三千六百隨李提督承勛出來庚子十月回去原本

萬邦孚號瑞巖浙江寧波府新縣人以欽差統領南兵游擊將軍署都指揮僉事領水兵二千二百已亥四月出來庚子回去原本

姜良棟號渭濱福建人以招撫海嶼把總來隸萬經理票下領兵八百戊戌九月出來庚子四月回去御下有法度經理亦憚原本

李應昌以天津督府票下中軍守備領水兵一千到江華已亥八月南下庚子十月回去原本

中軍陶明宰原本戊戌露梁之戰没于陣平攘錄已未淡河監軍

喬一琦字伯珪上海人萬曆己未楊鎬四路出師一琦別監朝鮮軍為虜兵所破走入朝鮮營姜弘立金景瑞率眾降明一琦謂我將士曰貴國與彼無怨庶幾解兵全歸俺則必不得免遂作一書付我國軍官使傳其子即墜崖而死其書曰文臣武將盡以社稷為戲一味循私貪鄙致屬國喪師萬計存留無幾困圍孤崖糧斷水盡其人馬朝夕且不保吾不忍見而又奉委監督其軍不敢離謹以三月初四日西向叩謝 皇恩自裁於家哈嶺上兒可傳與諸相知并親以意奏知 聖明其家口在京可朮赤城薛道寧分處還鄉故昨差去催

南來家丁而今遇此變是亦吾一汗心安事若再來不必出關矣父筆與桓兒云日光海君設壇于義州致祭尊周彙編

丁卯東援都司

王三桂天啓丁卯登萊巡撫李嵩奏朝鮮叛臣韓潤等引虜入安州節度使南以興自焚苑中國援兵都司王三桂等俱陣亡明史

丁丑東援舟師將官

金日觀不知何許人天啓五年以將才授守備效力關門擢鎮標中軍游擊加參將加薊鎮東路游擊事專領

南兵崇禎初加副總兵守馬蘭谷虜兵進攻馬蘭日觀
堅守不下朝廷獎其功加都督同知又復大安城錄功
進左都督久之移萊州副總兵十年春虜兵攻朝鮮命
從登萊總兵陳洪範往救駐師皮島四月虜攻皮島白
登庸先遁洪範亦避走石城日觀偕諸將楚繼功等相
持七晝夜力不支陣沒島城隨破贈太子太師世襲錦
衣副千戶建祠繼功贈恤有差明史

沈世魁本市僧其女有殊色為毛文龍小妻倚勢橫島
中至是以皮島副總兵代黃龍為總兵官明史丁丑虜陷
皮島金日觀等死之世魁據床而坐虜遣人誘降世魁

曰 大明臣死豈降汝乎虜殺之軍民死者數萬

王命道臣收世魁屍具棺槨以葬尊周景編

石相混糠粃在前則將使志士致慨於今日是以不揆僭妄敢以兵部衙門四字特揭卷首大書尙書之名採入史儒等十數人補其闕遺又以監我之軍援我之難死我之地者同編于後嗚呼先君子嘗惓惓於皇朝事實而獨恨此書未及乎定於在世之日顧余不肖承先志而校是編猶未克完粹重爲之悲感也男顯相謹題于皇華坊書屋

小華外史續編卷之二

皇朝遺民錄

首陽逸民吳慶元

編輯

男顯相重校

征倭後仍居東國諸人

施文用字宗祿號明村浙江府人兵部侍郎允濟子也萬曆壬辰倭奴犯我朝鮮昭敬王使大司諫鄭崑壽請救于皇朝朝議不一時允濟以序班副使力贊兵部尙書石星達于天子出兵東援及丁酉再捨文用以都司充游擊藍芳威行營中軍與之偕時年二

十五請獨當一隊輒賈勇先登常多鹵獲之功是以
宣廟移揭曰昨見邊臣飛報節下提孤兵扼強寇血戰
終日大鏖兇鋒捷音風馳歡聲雷動寡人聞來驚抃感
激不知所言晉泗之賊多聚陝川郇山之下踰入全羅
左脊出沒山谷焚掠殆遍湖嶺一帶爲之騷然小邦之
軍莫敢遮截茲者一捷賊乃大創殘民獲脫於兇焰天
兵亦賴以增氣後日掃蕩妖氛之績未必不因此一捷
爲之基也及凱旋也文用疾甚不克歸與同來徐鶴卜
居于嶺南之星州君聖山下築壇于屋後山上輒於朔
望二人北向四拜又畫浙江山水於一小屏以寓越鳥

之戀州人號其洞曰

大明 昭敬王愍其淪落且

以功有可紀特拜僉知中樞俾食其祿文用以景福宮
後脉稍低請于朝築土累石以補之其遺址今尚存焉
卒於崇禎癸未蓋文用之才不但長於弓馬韜略工於
彖繇醫卜之學嘗著兵學奇正堪輿指南醫卜妙設等
三書與鐵劔金堯藏之於家後入回祿而不傳惜哉
英廟朝贈兵曹參判又命施氏遺孫雖支庶勿簽軍伍
莊孝王癸丑令道伯訪其後孫起送曰星州有

大明洞卽壬辰東援中軍施文用之舊墟文用之父允
濟力贊東援之策而文用積勞行間因作我國之人豈

可不思收錄乎因以其孫有榮隸禁軍未幾賜武及第出身

徐鶴浙江人吏部侍郎麟湖孫及第景臣子也鶴爲人忠信質慤澗沈有膽略善騎射萬曆丁酉倭搶朝鮮游擊藍芳威領浙兵三千三百戊戌正月東來鶴以把總從焉慷慨誓師轉鬪千餘里屢破倭兵於昆陽等處及倭酋悉遁詔徵諸將還時中軍施文用亦浙人鶴在浙江時與文用同里閉相友善情愛如兄弟及文用病卧殊方不忍遽捨而去且有辛有之先見遂從文用上地於嶺南星州君聖山下結茅同居築壇于山上每於朔

望二人相與登山望拜若朝覲之禮人稱其所居曰

大明洞崇禎丙子虜難鶴聞講和之報遂慟哭曰吾之所以不歸故國者政爲避地而今虜侵及是邦安得三尺劍掃蕩妖氛上以除中朝之憂下以雪本國之耻乎辛巳州人李士龍殉節於錦州而歸觀也鶴馳往迎吊曰自顧羈旅之蹤未效裘革之志平生之恨孰大於此甲申帝殉社鶴聞之向西而哭顧語子孫曰汝曹勿復從事於舉業雖爲編戶之役能免左袵之辱亦復何恨遂處於一小屋中杜門不出其屋子尙在村人至今指點焉鶴之後承零替貧困且失乘譜無以自達

于朝 贈錄之恩獨不及焉勿簽之典與施氏同矣
余曾以知州躬履是洞登壇西望榛苓之思釜鬻之感
斗激于中不覺淚下遂置守壇二戶蠲其役

千萬里運糧官居明川取明守之義 秦綏德以把摠
丁酉出來其孫留居羅州 杜師忠以裨將丁酉出來

居大邱麻氏家乘 張龍金華義身縣人等周彙編 以裨將丁酉

出來居于王京麻氏家乘 仕本朝為同知中樞府事文為田

好謙妻等周彙編

避地東來諸人

康世爵字子榮荊州人其八代祖仁宣以通州土人移

居荊州子孫仍家焉其曾祖祐以勇健為金州參將伐

蒙古亡於胡地其祖霖為天水郡守壬辰 帝使楊

經理鎬征倭鎬奏請霖為中軍戰死於我平山地其父

國泰登武科為青州通判其季父國胤登文科除蘇州

通判世爵凡三男妹長適襄陽人李廷珪也其次世爵

其弟世祿丁巳國泰以青州軍器事為布政司論罪謫

遼陽世爵隨行時年十六戊午北賊陷撫順四摠兵往

擊之大敗而還七月命楊經略鎬御于遼陽城時廣寧

摠兵李光榮謀為國泰解謫以武藝可以制敵論奏蒙

宥擢為中軍已未三月經略分軍四路入胡地國泰亦

率廣寧軍與都督劉綬及喬一琦祖大定合軍先行而東兵落後一息程許牛毛山谷路狹而旁阻世爵隨國泰而去國泰叱使還家世爵不忍離去潛身帳外國泰撫其背曰此何等汝尚隨我也初三日過牛毛嶺遇賊交鋒忽左右隱賊突出夾攻都督見軍敗放火於藥積自焚死國泰亦中箭而歿世爵移置其父身體於北邊高巖底周築石藏取其父玉貫子投生於朝鮮陣中時東軍都副元帥陣於山上左右營將陣於平地翌日賊先擊左營一塵而盡殺之又擊右營右營敗入山上陣二元帥一欲降一欲戰一將遣使于賊須臾還報則

卽令盡棄兵器與賊相和賊自作外壁回匝屢重乃使數騎入朝鮮陣中

明兵之投入者盡數搜縛世爵亦被縛乃磨背石角縛絕自絕於是脫着鮮軍死尸之衣冠與鮮軍並立是夜走還遼陽欲歸故鄉則父骸未收欲留邊境則賊勢孔棘彷徨號哭之際得見其家書曰須待平賊收骸而歸又曰請於熊經略廷弼必有所補經略招世爵爲軍官使之督戰六月賊陷開原世爵避還遼陽七月賊陷鐵嶺世爵又還遼陽辛酉三月賊圍瀋陽時十二摠兵合守瀋陽城小軍多不能容乃使馬軍出陣城外賊迎擊之馬軍北入東門賊連尾而入

殺戮如麻世爵從西壕躍馬墜城經略薛公國用自焚
死御史張公勳不屈死世爵潛伏積尸底乘夜向鳳凰
城訪李仁厚李家有處女請世爵為壻世爵以其父駭
未葬辭謝不從未久李家被虜盡戮而世爵獨避焉壬
戌遇廣寧出身劉光漢義烈過人兼有勇健推以為義
兵將入鳳凰山留守三四朔帶馬軍西行路遇賊兵大
敗而潰光漢中矢而死世爵亦被擄幸以得脫自念與
其被髮而左衽豈若着冠而垂紳於是走向東國時乙
丑八月也以木實療飢又以刀割所着羊裘煮火而食
之作路十三日始越滿浦界又來江界地其後西路四

十二官殆無不踏丙寅入咸興地又至北青吉州等地
辛丑移居于會寧境都昆地

康公事實

世爵身長六尺餘目

視有光性倜儻淡沈多大節

昆倫集

居北土五十年人多

稱之蓋略解占相推命而未嘗鬻技拳勇絕人而未嘗

鬪競力農畜穀以其餘周貧濟飢未嘗有吝情所居乃

清人開市地世爵自以戴天為痛未嘗一毫近諸身畜

諸家家居江水之濱苦蓋悉以藁未嘗以草曰人或以

越江疑我我何以自解也北來諸官聞其名招延之能

知賢否高下不可意者雖請未嘗往也

藥泉集

一邑宰嘗

與之貝纓世爵辭曰我華人也冠幘不戴笠何以纓為

官吏有貪殘者輒言中國用法甚嚴何東國獨無烹吏
法乎官吏聞者皆憚之魁命世爵嘗娶東婦生二子灑
集其幼子患痘幾死妻邀女巫設神牀陳酒餅以禱之
世爵自酌酒跪獻曰果有神願見形雖無形願聞聲俯
伏俎伺良久曰吾熟視而不見其形靜聽而不聞其聲
神果何在仍散酒餅而掇神牀妻驚號乞止之叱不許
子痘亦已魁命嘗言清人度遼事歷歷如昨且論東征
諸將長短揚鎬寬厚得士心而昧於料賊以清人為易
與而敗劉綎杜松勇而無謀淡入險地不設斥候猝遇
賊而歿熊廷弼清白守法有威望而喜殺不已士卒多

怨亦以此不能成功雖然勝敗天也豈專在人乎藥泉

世爵性喜酒過鄉里所與識者輒索飲至醉乃去曰吾
平生不欲作非義事故於人無所求然惟酒能忘憂吾
每從而覓之又為方語不能了笑曰吾少去中國四十
年既忘中國語又習東語不成真所謂學步邯鄲者也
又曰吾知 明之亡朱氏之不能復興也漢四百年
而亡難以昭烈之賢不能復唐與宋皆三百年而亡

明自洪武至崇禎亦三百年天之大數誰能遠之虜
其終有天下乎夫虜方強而中國之人困弊已極父子
兄弟救死不給雖有英雄豪傑莫能抗也竢五七十年

或百年虜勢少衰中國之人且得休逸奮於積耻之餘起而逐之如元氏之亡此其已然之跡可知也西溪集又常語人曰汝邊人也邊上事宜知之忽有虜騎數萬來搶者汝何以禦之其人曰完聚邑城以禦之可乎世爵曰六鎮城池卑惡已甚聚士女于城中是自遺擒也江外山谷險阻虜由而入者纔數處用兵不須多隘口各置步卒數百千人十萬騎不能過也輕騎逸去虜後直擣巢穴虜不還則覆此北方禦敵之長筭也汝其識之鍾城府使李東郁康公傳後敘世爵嘗歎曰自吾年十三四時已有志在家為孝在國為忠如有所樹立今吾忠不成於國孝

不成於家為不忠不孝之人西溪集及將死敘其族世及亂離事以遺其子曰吾父死而未收其骨國亡而未報其仇不能滅死托他邦為命雜作於徒隸之間生為辱人死為羞鬼我即死汝曹必薄葬我令我負罪見先人於地下是汝曹與我為孝也且誠諸子不分田產同室以居昆命集扁其室曰楚冠堂尊周彙編其子孫至今同居如其誠昆命集元孝王庚辰贈世爵官錄用其子孫續編

麻舜裳字禹繡號三江都督貴之曾孫其父嚴字里光死於漢河舜裳被擄在賊中六年而逃天啓丁卯督糧登

州飄風於廟島三日而至豐川同舟二十九人溺死麻
獨生全寓光州地麻言中國養蠶種綿之事曰南方養
蠶者六七月多採桑葉乾之積置室中使無漏濕烟熏
之患翌年蠶出三眠後澆水飼之則蠶盛而絲多水綿
有雌雄葉多而莖麗者為雌葉細而莖小者為雄初生
三寸許揀去雄者而只留雌者插其中莖則甚盛多花
云麻以世襲指揮同知故稱同知而余到洪州時來見
而言集蓬直字中扶號北望子舜裳之子崇禎末痛
虜曾之僭號遂駕扁舟往來海濱及京師變轉達淮安
聞 弘光皇帝立乙酉從史督師可法未幾南都又

陷因復東還客于湖西泰安郡轉之石城縣縣中士民
為買田宅居焉惟日事釣魚以資生有時登高西望慟
哭及聞 皇朝人來寓王京來與交遊至其晚年遊
關東不知所終遺民錄

田好謙字遜宇廣平府雞澤縣人父允諧吏部侍郎祖
應暘兵部尚書好謙生萬曆庚戌隸鄉學生嘗至檄島
崇禎丁丑虜襲檄島覆之會虜將奇好謙貌釋其俘遂
與其徒十餘人東來屬訓練都監大將具宏席地命之
坐餽酒好謙不肯飲宏遽延坐堂上行賓主禮 純孝
王嘗三召見好謙感之每名節慶賀輒詣閤門叩頭

正德王嘗欲除一邊將好謙以不解東語固辭 彰孝

王丙寅終年七十七在廣平有子曰存兒及東來復娶

張龍女龍從天兵征倭好謙性謹厚能通書籍公卿大

夫莫不愛之最與東平尉鄭載崙善嘗泣謂載崙曰遠

托異國昔人所悲今中原陸沉吾得免左衽幸也况蒙

國恩廩食終身且有室家子姓復何流執惟是身歿寢

遠名與骨俱朽纍纍北邙誰復知我為中土人乎載崙

聞而悲之尊周彙編

李應仁太傅寧遠伯成樑曾孫少保征倭提督如松之

孫遼薊總督中軍部將性忠之子生萬曆戊午崇禎甲

申李自成陷北京 天子殉社稷性忠與兄子遵祖

死之未幾虜據北京應仁時年二十七義不薙髮乃脫

身東出朝鮮至漢陽朝廷欲官之應仁辭曰國破君亡

何以官為朝廷重其義不復強命世世復其家應仁遂

入東峽至淮陽居焉終身不出山門言語不改華音每

值 崇禎皇帝諱日輒上屋後山巔西向慟哭終日

應仁初名應祖以避亂故改今名 元孝王甲午卒年

九十七先是如梅之子憲忠死於涇河之役其子成龍

逃入朝鮮子孫多居海曲甲申築大報壇廷臣有以成

龍之孫白 元孝王命錄用 顯孝王庚申命立如梅

主不祧 莊孝王戊申又命立如松主不祧尊周彙編

胡克已宋文正公安國十七世孫萬曆庚申進士自登

州漂至朝鮮之鳳山郡因流落北關好文章曉天文地

理醫藥卜筮之術其孫斗弼 顯孝王乙巳上書請守

護華陽洞萬東廟 王仍給斗弼祿錄用其族有才者

尊編 庠生胡尚德克已姪麻氏家乘

文可尚廬陵人可尚父榮光天祥十六世孫居揚子江崇禎乙亥漂至朝鮮殷栗縣尋遣丙子

之亂思津尊編 宋信國公天祥之裔也自少絕意仕進居淡

山中布衣簞食晏如也崇禎末有事之武定遂遇清虜

之難無家可歸流寓利津當是時京師陷流賊蔓延遂

由沙門航海東抵關西宣川府聞鄭先甲逗遛寧邊地

來見執手潸然曰吾輩不能復君父之讎生何為哉因

與之居每終夜不寐泣血長嗥或逍遙於巖泉焉嘗有

詩曰流落腥塵萬事非 聖朝文物夢依稀江南庾

信平生恨塞北蘇郎幾日歸二十年來風異響八千里

外月同輝華音已變瓊裘弊誰識山東舊布衣遺民錄

元孝王丁巳以可尚及鄭先甲付軍職購屋以處之貴

其為 皇朝人也可尚手錄華語三卷進于朝授通

政階尊周彙編

孔枝秀孔子後裔也清虜入中原枝秀避地東來清虜

刷之惡人皆畏禍不敢匿獨許東豈匿之以免東豈亦義人也枝秀後居晉州以終尊周彙編

張雲起道士金陵人龍虎天師道陵之後天啓壬戌從鎮江至朝鮮因兵戈不能自還淪落東海上 彰孝王

乙巳金錫胄僨倭于東萊館遇雲起年六十四工麻衣法尊周彙編

庠生查斌勳壬辰東征副撫兵大受孫 庠生藍奭戊戌東征游擊芳斌子 庠生葉逢一作夏丁酉東征游

擊邦榮子居江界 儀賓陳鳳儀順德侯理玄孫 南京工部尚書王振業弟同知俊業俊業麻氏家乘即李如松

外裔也乙酉從 正德王東來居歙谷縣金剛山甌瓦遷之背刻曰 明人王世業豈俊業之一名歟尊周彙編

柳卜術 王唐人 庠生潘騰雲居金化 庠生劉自成疑子星居漢陽疑晉陽之誤麻氏家乘

石繼祖尚書星之弟參政奎之孫麻蓬直所著潮州石氏東來記曰萬曆壬辰倭奴入寇東國請援之冠蓋相望而廷議不一獨兵部石公力主東援拜奠東邦一則

皇上之恩二則諸將之力然其本則石公也石公不幸後宗族多不保甲申之變公之弟參政奎之孫繼祖不忍被髮左衽往依于遼東理隱庵道光大師師雖

緇流憐繼祖之志受而舍之六年山中獨保衣冠後因
事機之泄將有不測之禍庚寅六月遂與光師晝伏夜
行潛渡鴨綠直向吾家蓋此兩人從前慣聞吾以提督
公孫來居江鄉江界而麻石兩姓世世通家情同至親故
也執手嗚咽留置家中辛卯三月石生與光師欲遊覽
山川作伴出去壬辰石生娶于安峽云傳聞而已更未
相逢已矣春光師忽到得聞石生生子甫七歲生遂奄
忽云噫石生生丁不辰竄身東來宜家未久天奪脩期
峽裏蓬華叭叭其啼孰知為 皇朝人之裔孰能念
石尚書之恩憐之恤之乎願吾同是華裔義當匍匐而

身病莫振痛幽明之永隔恨舊誼之莫追今見光師如
見石生留之而不忍送居數月師遂告別曰從此永辭
門下雲遊之蹤將不知止於何處悲夫仍携筇飄然而
去師固非常人麻氏家乘○莊孝王已未因石漢英參班有下教見原編
麻舜裳鄭先甲查斌勲文可尚石繼祖柴植化福祥
田好謙胡克已胡尚德康世爵萬警陳鳳儀藍奭葉
逢一作夏千燁李成龍彭富山劉子星張雲起王振
業王俊業安尚書柳卜術王唐人右二十六人崇禎
甲申前後相繼出來麻氏家乘○柴植化福祥又見於經理萬世德孫下更考
王以文字岐陽初名鳳岡山東濟南人崇禎名臣楫之

孫彙周幼而魁梧儀度如巨人遇事有機變以智勇聞

於州郡鳳岡風裁魁偉慷慨有大節自宗禎丙子春流

賊寇掠鄉里以文挈家避仇於海島中丁丑叛賊孔有

德陷皮島以文舉家被獲以文時年十三賊憐其少壯

其人以甘言誘之終不屈賊義之不加害併夫人黃氏

囚之尋送之瀋陽是時正德王以鳳林大君質於瀋

陽一見而奇之請以為管下甲申春聞京師不守

帝殉社稷以文日夜號哭却食者屢日及清虜入燕天

下薙髮以文凌意東來弘光乙酉春王東還與黃留

守諸人陪從王命築室于潛邨朝陽樓之南厚賜衣

廩將與義旅有收用之意賜名以文曰自在瀋陽既共

患難豈不欲與予同休戚乎對曰羈旅之臣敢恃寵榮

而忘國讎哉天若祚明克復中夏歸死足矣言未

已泣下感慨如無所歸王嘉其志不強仕之求曆已

友夏王薨以文感先王之恩禮慟大義之未伸閉

戶自靖不言世事或有問皇朝事者輒嗚咽不能

言或慟哭嘔血是以人皆不忍問焉遺民錄其婦黃氏侍

仁宣王后嘗從簾隙闕賀珽金冠象笏珽聲琅然歎

曰吾家昔嘗服是服矣不意復見於此尊周彙編癸丑彰

孝王念陪從人子孫漸多難以內帑廩給命議接濟之

小華文苑續編卷之二 十四

方朝廷請以白衣屬訓局以文歎曰去國偷生已三十年矣豈可屑屑於餬口哉遂不受料與諸子漁樵於漢江之上每遇層崖茂樹獨坐終日花朝月夕涕泣不語漢上之人莫不悲之久之已卯春卒于漢陽年七十有五初夫人之在瀋陽也 皇朝宮人崔氏亦在瀋陽

與夫人周旋服勞於嬪宮仍與東還及老將出私第而無可歸崔氏每誦夫人之德且懷共難之誼欲為依歸王命以文曰崔宮人是 兩朝舊物勤勞甚多今老無依願托於爾家將若之何以文辭曰宮人之情則可矜而出處私家義有不安不敢奉命已而崔氏遂出居

廣平田氏家云

遺民錄○莊孝王庚戌置漢掖傳教見原編

楊福吉字祥甫其先蜀人後徙通州福吉幼孤貧然卓犖好奇節崇禎初遊學京師與韓知縣承宣友善是時知縣守歷城福吉遂客焉戊寅秋清虜入寇山東州縣望風奔潰知縣謂福吉曰虜騎將至計將安出福吉曰兵不素教又值飢荒臨亂效死其誰聽之我則惟有一死而已頃之賊兵迫城福吉與知縣立門招民兵皆竄匿無一應者福吉歎曰人心至此遂帥所部將吏為固守計不一日城陷知縣死之福吉亦被鎗氣絕翌日復甦賊知福吉之生又梓使之跪福吉厲聲曰死則死矣

此膝不可跪賊怒執送瀋陽時 正德王以大君在瀋陽見以處置管下與馮三仕諸人從出東國 王館於宮門之外時時召接 王嘗歎曰寡人北征之志何日忘之其於兵少力弱何願聞公等之計福吉流涕對曰臣聞國君人神之主也心者萬事之本也天下事惟在於誠與不誠也孔子曰好謀而成好謀而不成不如無謀也願 大王熟策之古之人有犯其至艱而圖其至遠也出於其口成於其手者無他心之誠謀之深作其氣而振其勢也方今中國臣民莫不思 先帝而痛徹骨髓雖裂冠破冕被髮左衽而偷生之辱人孰無之

是以三王之治必本於人情人情如此其氣可以作之其勢可以振之強與弱寧有素定乎孟子曰未有仁而遺其親者也未有義而後其君者也又曰仁者無敵於天下仁義之所在強亦隨之以 大王英武之資秉春秋之義興仁義之師沛然北征孰能禦之天下忠義之士孰不鼓動而景從乎 王動容嘉納未幾 王薨福吉憂鬱成疾永曆乙卯卒于 皇朝人村年五十九

遺民錄

馮三仕字惟榮青州臨朐人

遺民錄

父秀舉進士官兵部

尊周彙編

三仕天資恭儉好義天啓以來魏忠賢用事紀綱

日頽三仕不應貢舉躬耕自給崇禎戊寅冬清虜入山東張布政使秉文力戰遇害州縣殉節者百餘人士民不屈者甚衆皆執送瀋陽三仕亦與焉先是 正德王以大君質留瀋館淡相親信不久京師陷三仕日夜憂憤不欲歸鄉里及 王歸國與王以文諸人俱從 王使居宮門外厚遇之時時召接每屏左右從容論天下事大義未伸而 王薨自此杜門惓惓無生世意永曆辛亥秋卒于王京 皇朝人村年六十五臨歿誡家人曰吾不及見中原之清明羈死異國誠先祖之罪人也我死歛以常服勿用玄纁旌翼及柳勿使增罪戾也

遺民錄

王文祥字汝章山東青州人少有氣節崇禎末羣盜大亂文祥設砦自衛率士民捕勦一寇略盡甲申京師陷清虜至破砦被執不屈送之瀋陽先是 正德王爲大君時質於瀋館聞文祥之來心奇之請爲管下及 王東還與楊福吉諸人偕來至則賜第宮門外厚其餼廩方招賢募士將伸大義於天下文祥拊劍卧薪待之有年矣永曆已亥 王薨文祥慟哭曰此生之及於死者不知其幾矣不死而至於今日者感 先王之恩禮望中原之恢復 王奄棄羣臣吾何以生爲自此屏居絕

跡每風雨之夕輒仰天號哭戊辰卒於宮門外年六十
有七遺民錄

裴三生字之重大同人狀貌魁偉崇禎末流賊四起三
生集義兵保鄉里及京師陷率數千人勤王清虜連破
李自成自成西奔畿內州縣為虜兵所掠人民倉皇靡
下皆散遂被執虜將愛星阿以刃脅降三生植立嫚罵
賊壯之繫送瀋陽時 正德王方質於瀋館王文祥諸
人先已被執因與之居弘光乙酉春 王東歸與俱至
則賜衣食以處之宮門外將圖恢復日賜延接未幾
王薨北征之議遂寢常懷憤痛中夜悲泣不自勝竟以

憂憤卒

遺民錄○三生父山大俘於虜時 皇朝人
十數姓同居謂之 明人村乙酉 正德王

返自瀋館贖之東來山大道死子三生以其生於中國
擄於虜歸於朝鮮名曰三生時纔三歲鞠於 皇朝
宮人崔同姐尊周彙編所載
如此今兩存之以俟更考

王美承字繼伯山東東昌人性慷慨有氣義喜施與常
賑人之悉而如不及由是人皆感其德而服其義甲申
夏聞李自成僭號誓縣中士民曰吾與汝俱以 大
明之臣子禍變至此寧可束手待死乎此正我輩報國
之秋也乃召募義旅縣中願從者千餘人晝伏夜發將
襲自成當是時流賊交橫益以飢饉軍中無以為糧而
摠兵吳三桂開關納清虜美承進退不得遂為虜兵所

執入瀋陽先是 正德王以鳳林大君質於瀋有以大
君將圖恢復之意言於美承者美承仍與裴三生諸人
虜為管下 王既歸國舍之於宮之南墻外而廩以食
焉 王嘗悶其孤苦而命娶對以國讎未報敢為兒女
計乎聲淚俱下聞者莫不感泣 王將興義旅命仕之
對曰家國俱亡而托身於 大王之國者寧為仕宦哉
朝鮮之於 皇朝義則君臣恩猶父子君父之讎臣
子不可以不報也 王興義師為天下倡以圖復讎則
天下之士孰敢不從臣雖庸愚亦當冒刃行間以效一
死區區志願永畢於斯辭氣慷慨 王益義之未幾

王薨美承日夜悲泣自是水漿不入口者五日疽發背
同來諸人勸以藥餌揮却曰北都之變可死而不死尚
有望於中興故也今日事竟不成天也不死尚何待乎
因誦出師表撫膺已而卒黃功等諸人收葬美承遂無

後遺民錄

黃功字聖報杭州人崇禎庚午進士授壽光知縣功舉武進

士官池河守備以戰功顯尊編屢官至中都留守是時流賊日熾功知

賊必至集士民鍊兵繕甲盡力調濟人心稍固會督餉
住徐州聞京師變日夜慟哭病篤史可法立 福王

于南京功收散卒入保宿遷史可法督師淮陽召功還

功曰清虜已至，彼不敢聞命也。乃集鄉兵三千，曉之以忠義，誓之以死守。未幾虜合兵至，勢益迫，且戰且守，斬獲甚衆。竟以食盡無援，城陷虜生致脅降，終不屈賊。壯其忠，繫之瀋陽。有詩曰：彼彼城守力孤單，拘繫耻漢北。地寒死固甘心，蘇武節生而何面。鍾儀冠精忠，無聞亡軍將富貴。都輸誤國奸，百戰餘思猶未已。天狼一點劍頭看時，正德王以鳳林大君先在瀋中聞功來，要與相見，因與之同處。是時鄭先甲諸人先後爲管下相隨，周旋不避艱險。弘光乙酉，王東還出館外十里許，功呼天慟哭，引刀自刎。王惡奪其刀，慰之曰：死則死，吾

不欲強送我至遼野，任自從容。功黽勉行至遼東，拜謁曰：國破家亡，苟延視息者，惟望中原之恢復矣。至此路窮，不死何待？聲淚俱下，一行莫不於悵。王挽耳語，賜手札，功拭淚拜曰：誠如此，當爲前驅。遂渡鴨綠，贈同來諸人詩曰：萬歲山烽血淚中，金陵佳氣一時空。此生不死將何適？扶植王春鯨域東。至則處宮牆外，衣食之無時。召接共議大事。王卽位，除禮曹參議，又授嘉善階。皆辭不受。其後使監咸鏡原襄兩道，益硝磺，差使員功曰：此非官職也，故不敢辭。東國做硝之良法，自此始。永曆已亥，王薨，功念國讎，不得以報也。家鄉不可以歸也。

先王之恩不可以忘而偷生異域無以自慰也自此杜門時時扼手札慟哭丁巳春病革及歿遺命勿祭曰吾事親未能盡孝事君未能盡忠辜莫大矣已焉哉誰與歸何面目見先帝於地下言未已而卒賜葬于楊州地林寅觀陳得曾勝等九十五人永曆丁未漂到濟州自言行商入日本遇風到此云牧使洪宇亮輕報監司洪處厚處厚馳啓廟議將以漂人押送于清新牧使李擴探問崇禎後消息答曰目今永曆皇帝係

神宗皇帝之孫也見據廣西四省又一藩王割據福建東寧地方鍊兵秣馬以圖恢復年年與清搆戰非

水則陸比年以來清遣偽院部陳錦續李率秦烏金王世子阿格傷巴都提督馬得光咬獵王等此皆濤之名將在來交鋒無一生還其餘偽將擒斬者不計其數中原臣庶好望中興盛事今年夏清遣使孔孟章及兵戶部到福建與我藩王議和寅觀等開船後未知成否如何因出示永曆二十一年曆書又問崇禎之後永曆之前無繼統之主耶曰乃隆武皇帝又問藩王何人耶與永曆分而為二耶曰藩王係永曆勅封延平王賜麟玉尚方劍便宜行事招討大將軍又問割據何地曰福建離廣西數千里之遙陸路不通以海道往返奉

永曆帝分土封藩王開府鍊兵以成犄角之勢云因押到弘濟院皆不言不食屢投書懇歸本國又有詩曰

神皇德澤遍東垠草木亦知感至仁何事卽今爲異鼓滿都皆是壬辰人朝廷亦難之以功南人遣令曉諭功不得已往漂人所住館寅觀等聞功南方人紛紛流涕拜迎功亦掩泣相與分次而坐曰爾今俱在難中漂來外國言語不通其情賦矣來往經留之事細說與我知道寅觀曰經商海上遭風船隻已破濱苑之境多感國王相救意謂生還故鄉今反到此又送清國不知何意幸得同鄉在此乞賜明教說罷舉皆慟哭功曰

爾自思量船沉海底只爲魚腹之餐海嶼餓死必作羣鴉之食皆是爾等不知時運而至此當感國王相救何無知甚乎古語云死生有命哭之何益衆皆收淚拜謝功曰連日不食主何意見蘇武在虜嚙雪吞糞夷齊入山亦啖草根自古忠臣烈士未聞不食而今爾等有飯不喫自貽飢餓豈不惑哉寅觀曰多憂怕死不欲西行功笑曰此兒童之見也爾旣商人名非盜賊古人不云乎心無邪曲可與霹靂同居敗辱將刑面不改容我領受誅此爲豪傑今爾們哭不絕聲如失乳嬰兒何足道哉寅觀曰纔得心明遂皆進飯又曰今日之事多蒙

鄉親相救不知鄉親因何事來此功曰中原淪沒之後至此二十餘年家鄉信息一字未聞幸得爾等到此爾等應知南方平亂之由其中強弱之形即日何君保得幾城幾縣文官是誰武將何人虜兵到何地方莫爲隱匿一一開示以慰我客地思鄉之情也寅觀曰我們雖在南方入於海島本州消息尙且難聞焉知國家之事聽說永曆天子入於海島之四處乃是雷化寧州之界爲都不知是實功不覺法然而泣曰一別家國之後始見爾們意謂鄉信國事必有可聞爾亦不知此生之前更待何人而詳聞乎因嗚咽不已寅觀等因挽請

問北京敗亡之由答曰古人有言箭射朝陽殿箭吟細柳營內人紅袖淚王子自衣行此乃破國之狀也又問虜之安民如何功笑而不答寅觀曰我問此事惟笑不言主何意也答曰我亦在外國安知其安民之如何又問我等遙在海外聞崇禎皇帝至明至仁何事山河崩裂答曰爾知天子仁明焉知臣下狠心文官付任留千兩武將行兵要百斤裏外官員財上做無錢不用有能人寅觀等嗟歎不已又問文武之中何無一人平亂者乎功曰此如大厦將傾一木怎扶縱得子牙弄出諸葛復起奈何寅觀曰虜入北京民心如何肯服

答曰此事爾亦當知何須用問會勝等問功家鄉之事
功曰一夜之歡惟恐不盡那可提起傷心之事乎勝曰
非也今日雖去虜地倘或他日幸得南回往叩貴府當
拜謝今日相逢之緣功聽久流涕曰縱得爾信回鄉我
已作不肖之子今有四句爾們聽着家居中國近蘇杭
不說先人只姓黃正直平生無倚向惟餘四海一空囊
勝等掩泣曰如此高名必知彼虜所忌之事伏乞訓之
功以一首詞答之曰爾今聽我說原因側耳擗頭仔細
聽他國逢人須好話爾今同伴莫相爭到時莫說能文
字到時莫說會當兵到時莫要回鄉土到時莫要誇其

能四件勞心須謹記我將何事做人情勝等聽罷拜謝
不已而因各歸睡處功倚杖不寐成八句詩曰昨日承
恩到此來一宵勸解我心灰文人聽說低頭哭村漢聞
言把口開千句問來無一答半聲應出又重推至今若
不回心轉爾死焉知何處埋少焉東方已明寅觀等將
西去功進館寅觀等喜歡前來問安曰其實多感高情
無路可報還有何囑付否功曰見汝回心我亦傷情乃
將一詩以作送行之資題畢慘然淚下寅觀等齊哭發
程功送于碧蹄館寅觀曰多蒙厚恩又勞遠送我等不
知所酬功曰他鄉相逢略陳故國之情豈有望報之心

乎寅觀曰我想多費東國銀糧寔自難報功笑曰依爾
欲報更往半年如何寅觀亦笑陳得曰我們同伴二三
人能唱請聽如何功曰俱在客裏憂思若有佳音則更
妙更妙得卽叫三人唱曰劉智遠子井邊遇母功隨卽
唱乃是劉智遠磨房相會得等聽罷喜其語音之合同
齊聲嚇采再要一唱時通官持酒食前來願聽高音佳
韻功曰今日與同鄉作別而媿無酒盃相餞幸君携酒
而來借作陽關之別如何通官曰當得當得功曰爾在
家鄉聽唱無非古調我今來於東國思前想後往古來
今連作一唱名曰木蘭花我今唱與爾聽得曰諾功唱

曰自別家亭富貴榮華一時傾歎先人誰是我遭不幸
落在天涯度此生想當初文着藍衫拜聖廟武被金甲
冠紅纓御前欽命傳旨意後苑防門提調兵也曾執戟
隨鑿駕也曾宣令在京營俺也曾提軍修築邊城路俺
也曾領兵三山去討征也曾南京鳳泗爲留守也曾西
洋奉勅做差卿俺也曾太湖埋伏爲制使俺也曾池河
守備顯雄名真堪羨事無成空勞十載爲王庭誰知草
寇干戈起翻天覆地把人驚恨奸臣雄兵百萬皆投降
何況區區是小生忠不忘義不更多感君王帶此行相
憐悶愧平生言不董語難聽報君恩未用奇才處歎雙

親鶴髮已延齡拋妻子阻隔關河遠憶家鄉畢竟是伶
仃有音書難過豺狼道眇家期廿載鴈行聲他鄉裏空
思憶俺這裏信難憑都做了一事無成兩鬢星唱罷得
曰古人有言與君一夜話勝讀十年書以此謂也是夕
功又贈詩曰此是男兒遇數奇慙慙前去有何迷來朝
同上陽關道我往東京爾往西翌日寅觀等登道西去
功住馬凝視不忍回程因於馬上吟贈一律曰僕夫催
秣野雞鳴問爾胡然萬里行孫賈失王生亦罪田橫守
志死猶榮明天在上堪無愧湯鑊當前詎可驚歸後若
逢諸節士為言今日舊差卿一吟一歎不覺涕淚霑襟

即日復命歸家咄咄自責曰今此二十餘年苟全性命
本非樂為漂人喻送豈本心共寅觀執之瀋陽不知所
終遺民錄

柳溪山字許弄大同人天資澹泊絕俗隱居千夫山中
有家僮數人種黍以給崇禎甲申春 帝殉社稷慟

哭曰 天子殉社何冠帶為乃裂巾衫棄妻子蓬首

垢面陽狂轉之河間未幾清虜至遇賊輒詬罵賊徒相
戎以為無傷病狂者然竟為其所疑送之瀋陽先是

正德王以大君為質瀋館當是時始為東還溪山及聞
王慨然有興復 明室之志求華人之可與有為

者脫身於萬死之中與黃功諸人陪從以來賜第朝陽樓南墻外而衣食之嘗召接設酒食談論以慰去國之思溪山退謂諸人曰 國王在藩也有卧薪嘗膽之志悲憤益切故吾等出萬死千里以從及夫東還時移勢異大計不就那堪終天之痛乎自此辭病斂跡薪水資生非其力不食惟日縱酒悲歌已而病革永曆戊戌春

卒遺民錄

鄭先甲字始仁琅琊人曾祖文謙嘉靖間吏部左侍郎崇禎中舉進士以疾辭歸聞賊逼京師即赴皇城賊已縱橫行旅阻絕寓居野寺已而聞京師陷縞衣發

喪日夕慟哭竟為清虜所執至瀋陽先是 宣文王以大君館於瀋而東昌人王美承諸人亦在其中要與同居得為管下從 王東來而渡鴨綠江願留香山 王不得已許之曰無所托乎對曰願公子不忘 神皇帝恩 王曰何敢忘何敢忘賜錦衣米粟及其老也朝廷致之王京月賜廩米俾授譯學居常悒悒與文可尚遊山水間徜徉忘歸有詩曰三角山南漢水東寂寥誰與此身同君親永隔乾坤外師友分離道路中鄉夢有蛩容易覺尺書無鴈極難通未成歸計關河阻空望青齊意不窮丙寅冬卒遺民錄

經理萬世德之孫居平壤 中軍千志中之孫居清州
 參將彭友德之孫居東萊 游擊彭信古之孫居醴
 泉 游擊柴登科之孫植居泰安 都指揮使劉武仲
 之孫居晉陽 游擊陳愚衷之孫居雲峰 參將楊登
 山之孫居南原 中軍化燮之孫福祥居順天 參將
 龐渤之孫居公州 右十人載於麻蓬直東征將士遺
 後錄曰中國之人來居東土者甚多萬曆壬辰丁酉間
 征倭諸將娶于東邦或有子有女不能率歸仍為東人
 者多矣云則此十人似是產於我東者也
 韓登科未詳其鄉里 元孝王乙卯與其徒劉太山金

長生等上言俱以中土之人值此凶荒將顛溝壑登科
 年八十太山五十九長生六十日薄西山登科又壬辰
 征倭備禦宗功之孫微勞亦可紀也命廩給終其身周

彙編

東來 皇朝女人

崔回祖山東省青州府壽山縣人也父雲溥為紅通知
 縣還家而姐始生故名之乃天啓乙丑十二月十七日
 也祖鳴吉外祖支名山姐為同縣四基倉居秀才張九
 簫妻九簫父洙泗崇禎壬午被掠於虜翌年六月入昭
 顯質館乙酉東歸每言 明季異災曰常有白狗自

山上而下人立而言曰天亂天亂人見而尋之則不見
 又何男子飛入人家自稱仙人索茶喫之而旋復飛去
 其飛雖不能如輕鳧之狀然過於家雞頭髮編作三條
 姐親見云姐能畫善繡為人明透無事不解多有我國
 人所不及者開居漫錄 元孝王已卯以侍衛屢朝授尚宮
 職寶鑑別編歿于乙酉年八十一葬于楊州香火村開居漫錄
 屈姐蘇州府蘇州縣人 皇朝宮女也七歲選入宮
 侍 孝純劉太后即 毅皇生母也甲申闖賊陷
 皇城開居漫錄 周皇后步趨壽皇亭屈姐從之
 皇后慨然麾使去 皇后既崩姐逃入閭巷及虜

入北京姐被獲姐在宮掖習聞流寇惡及見虜常嫚罵
 曰流賊虜會多爾袞嘗圓兜短衫垂面紗而坐姐輒笑
 罵曰男子亦面紗真流賊也面紗者漢女飾也多爾袞
 甚慚然愛其端麗不忍殺尊周編以姐歸世子館時年二
 十二是歲十月世子嬪生慶安君子質館姐克勤撫護
 乙酉世子還開居漫錄姐從至朝鮮事 莊烈王妃姐常北
 望中原泫然泣下語流賊必憤罵若狂尊周編常言
 明季紀綱大壞獻遺公行女子有才貌者皆為邑倖脅
 奪以媚權貴或自入已姐母生女輒殺之姐之初生其
 外祖母適來取而養之而不死云開居漫錄姐不知書自言

尊周彙編在蘇州一村皆其同姓而官人須廩記書其姓如
 尺字其音為圭我國人呼為圭姐使譯官質諸中國人
 乃屈氏也屢拜至尙記乃女官之六品也 莊烈王死
 薨姐出慶安君家至 元孝王丁丑歿賜棺器葬于高
 陽郡之大慈洞臨昌君焜熾誌墓曰姐生于越閩長于
 燕薊卒死於海外徧荒之土有足以悽愴而傷心者惟
 其弱歲充 皇宮下陳遭罹禍故親見天地之翻覆
 而幸自潔其身托媵於我禮義之邦蒙國渥恩以考終
 焉其視張瓊英玉清惠拘留幕自歎其悲恨者相去
 遠矣間居漫錄 正德王嘗詢髻制于姐 元孝王命田好

謙之子會一主屈氏祀歲給祭需尊周彙編

柔姐緊姐皆與崔回姐俱來緊姐中朝宰相之妻娟秀
 善粧梳有女士風死於丁亥柔姐善刺繡死於庚申遺
 言火葬諸姐不解書其姓名籍貫皆不可考尊周彙編

小華外史續編卷之二

小華外史續編卷之二

